

ЎЗБЕКИСТОН РЕСПУБЛИКАСИ
ҚОНУН ҲУЖЖАТЛАРИ
ТЎПЛАМИ

5-6-сон
(65-66)
2003 й.
март

Ўзбекистон Республикаси Қонун ҳужжатлари тўплами тўрт бўлимдан иборат:

тўпلامнинг биринчи бўлимида Ўзбекистон Республикаси қонунлари ва Олий Мажлиснинг қарорлари эълон қилинади;

иккинчи бўлимда Ўзбекистон Республикаси Президентининг фармон ва фармойишлари эълон қилинади;

учинчи бўлимда Вазирлар Маҳкамасининг қарор ва фармойишлари эълон қилинади;

тўпلامнинг тўртинчи бўлимида Ўзбекистон Республикаси Конституциявий судининг қарорлари эълон қилинади.

МУНДАРИЖА

Иккинчи бўлим

45. «Давлат хизматчиларининг меҳнатини рағбатлантириш тўғрисида» Ўзбекистон Республикаси Президентининг 1997 йил 13 майдаги ПФ-1778-сон Фармонига ўзгартиришлар киритиш тўғрисида» Ўзбекистон Республикаси Президентининг 2003 йил 6 мартдаги ПФ-3218-сон Фармони
46. «Қишлоқ хўжалигида ислохотларни чуқурлаштиришнинг энг муҳим йўналишлари тўғрисида» Ўзбекистон Республикаси Президентининг 2003 йил 24 мартдаги ПФ-3226-сон Фармони
47. «2003 йилнинг 1 апрелидан бошлаб уй-жой-коммунал хизматлар ҳақини тўлаш бўйича бериладиган имтиёзлар ўрнига компенсация пул тўловларини жорий этиш тўғрисида» Ўзбекистон Республикаси Президентининг 2003 йил 27 мартдаги ПФ-3227-сон Фармони

Учинчи бўлим

48. «Ўзбекистон Республикаси фуқароларини ҳарбий рўйхатга олиш тўғрисидаги низомни тасдиқлаш ҳақида» Ўзбекистон Республикаси Вазирлар Маҳкамасининг 2003 йил 4 мартдаги 119-сон қарори
49. «Муқобил хизматни ташкил этиш ва Ўзбекистон Республикаси фуқароларининг уни ўташи тартиби тўғрисидаги низомни тасдиқлаш ҳақида» Ўзбекистон Республикаси Вазирлар Маҳкамасининг 2003 йил 11 мартдаги 128-сон қарори

50. «Тадбиркорлик субъектлари — фақат юридик шахслар томонидан қонун ҳужжатларида белгиланган тартибда амалга ошириладиган фаолиятнинг айрим турлари рўйхатига қўшимча киритиш тўғрисида» Ўзбекистон Республикаси Вазирлар Маҳкамасининг 2003 йил 11 мартдаги 129-сон қарори
51. «Солиқлар ва бюджетга мажбурий тўловлар бўйича муддатида тўланмаган солиқларни корхоналар ва ташкилотлар мол-мулки ҳисобидан ундириб олиш тартиби тўғрисидаги низомга ўзгартиришлар киритиш ҳақида» Ўзбекистон Республикаси Вазирлар Маҳкамасининг 2003 йил 12 мартдаги 133-сон қарори
52. «Муддатли ҳарбий, муқобил хизматнинг белгиланган муддатларини ўтаб бўлган фуқароларни бўшатиш ҳамда навбатдаги чақирув тўғрисида» Ўзбекистон Республикаси Вазирлар Маҳкамасининг 2003 йил 13 мартдаги 136-сон қарори [Кўчирма]
53. «Республика ихтисослаштирилган тиббиёт марказлари фаолиятини ташкил этиш масалалари тўғрисида» Ўзбекистон Республикаси Вазирлар Маҳкамасининг 2003 йил 17 мартдаги 140-сон қарори
54. «Судлар ва адлия органларини ривожлантириш жамғармасини ташкил этиш тўғрисида» Ўзбекистон Республикаси Вазирлар Маҳкамасининг 2003 йил 18 мартдаги 147-сон қарори
55. «Аҳолини ватанимизда ишлаб чиқарилган ун ва нон маҳсулотлари билан таъминлашни яхшилаш чора-тадбирлари тўғрисида» Ўзбекистон Республикаси Вазирлар Маҳкамасининг 2003 йил 25 мартдаги 155-сон қарори
56. «Ўзбекистон Республикаси Вазирлар Маҳкамасининг «Бозорни истеъмол товарлари билан тўлдиришни рағбатлантириш ҳамда ишлаб чиқарувчилар ва савдо ташкилотларининг ўзаро муносабатларини такомиллаштириш чора-тадбирлари тўғрисида» 2002 йил 13 ноябрдаги 390-сон қарорига ўзгартиришлар киритиш ҳақида» Ўзбекистон Республикаси Вазирлар Маҳкамасининг 2003 йил 31 мартдаги 164-сон қарори

ИККИНЧИ БЎЛИМ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

45 «Давлат хизматчиларининг меҳнاتини рағбатлантириш тўғрисида» Ўзбекистон Республикаси Президентининг 1997 йил 13 майдаги ПФ–1778-сон Фармониغا ўзгартиришлар киритиш тўғрисида

Ўзбекистон Республикаси Президентининг «Прокуратура органлари ходимларининг иш ҳақи миқдорларини ошириш тўғрисида» 2002 йил 20 декабрдаги ПФ–3178-сон Фармониغا мувофиқ «Давлат хизматчиларининг меҳнатини рағбатлантириш тўғрисида» Ўзбекистон Республикаси Президентининг 1997 йил 13 майдаги ПФ–1778-сон Фармонининг 1-бандидаги «ва прокуратура» сўзлари чиқариб ташлансин.

Ўзбекистон Республикаси Президенти И. КАРИМОВ

Тошкент ш.,
2003 йил 6 март,
ПФ–3218-сон

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

46 «Қишлоқ хўжалигида ислоҳотларни чуқурлаштиришнинг энг муҳим йўналишлари тўғрисида

Қишлоқ хўжалигида иқтисодий ислоҳотларни янада чуқурлаштириш, қишлоқда ишлаб чиқариш муносабатларини такомиллаштириш, қишлоқ хўжалик ишлаб чиқаришини бошқаришнинг бозор тамойилларига мос келадиган ташкилий тузилмасини тадбиқ этиш, қишлоқ хўжалик маҳсулотлари ишлаб чиқарувчиларининг мустақиллигини кенгайтириш ҳамда уларнинг ишончли ҳуқуқий муҳофазасини таъминлаш мақсадида:

1. Қуйидагилар қишлоқ хўжалигида мулкчилик шаклларини ўзгартириш ва ишлаб чиқариш муносабатларини такомиллаштиришнинг энг муҳим йўналишлари этиб белгилансин:

суғорма деҳқончилик ҳамда суғориладиган экин майдонлари чекланганлиги шароитида мулкчиликнинг ижара шакллари ва шартномавий муносабатларга асосланган хўжалик юритиш тизимини ривожлантириш;

қишлоқда асосий ишлаб чиқариш бўғини ҳисобланган қишлоқ хўжалиги товар ишлаб чиқарувчиларининг манфаатларини пухта таъминлашга қаратилган иқтисодий ва ҳуқуқий шарт-шароит яратиш, тайёрлов, қайта ишлаш корхоналари, моддий-техника ресурслари етказиб берувчилар, молия-банк муассасалар ҳамда бошқа хизмат кўрсатиш ташкилотлари фаолиятини ушбу мақсадга бўйсундириш;

хўжалик юритишнинг ширкат, фермер ва деҳқон хўжаликлари ташкилий-ҳуқуқий шакллари сақлаб қолиш, истиқболда асосий қишлоқ хўжалик маҳсулоти ишлаб чиқарувчи субъект бўлиб қоладиган фермер хўжаликларини ривожлантиришни устувор йўналиш сифатида белгилаш.

2. Шундай тартиб ўрнатилсинки, бунда:

а) Қорақалпоғистон Республикаси Вазирлар Кенгаши ва вилоят ҳокимликларининг тақлифларига мувофиқ қишлоқ хўжалик маҳсулотлари ишлаб чиқарувчилар билан тайёрлов ташкилотлари ўртасида тузилган контрактация шартномаларини умумлаштириш асосида жорий йилга пахта ва дон етиштириш прогноз кўрсаткичлари республика ва минтақалар даражасида белгиланади;

б) қишлоқ хўжалик товар ишлаб чиқарувчилари хўжаликларнинг ихтисослашувини ҳисобга олган ҳолда ва тузилган контрактация шартномаларига асосан қишлоқ хўжалик экинларини мустақил равишда жойлаштирадilar;

в) хўжаликлар ўз меҳнати натижаларини, шу жумладан етиштирилган маҳсулотни, ўзларига тегишли мол-мулк, молиявий ва моддий ресурсларни ўз хоҳишига кўра тасарруф этадилар.

Ўзбекистон Республикаси Қишлоқ ва сув хўжалиги вазирлиги, Иқтисодиёт вазирлиги, Адлия вазирлиги бир ой муддатда Фармоннинг мазкур бандидан келиб чиққан ҳолда амалдаги барча низом ва меъёрларни қайта кўриб чиқсин.

3. Ўзбекистон Республикаси Қишлоқ ва сув хўжалиги вазирлиги, Иқтисодиёт вазирлиги, Молия вазирлиги, Адлия вазирлиги, Ер ресурслари давлат қўмитаси, Қорақалпоғистон Республикаси Вазирлар Кенгаши, вилоят ҳокимликлари қишлоқ хўжалигида ишлаб чиқариш муносабатларининг асосий шакли сифатида ижара муносабатлари кенг ривожланишини таъминласинлар. Вазирлар Маҳкамаси бир ой муддатда 2004 йилдан бошлаб барча ширкат ва фермер хўжаликларини қишлоқ хўжалик экинзорларидан фойдаланишнинг ижара шаклига ўтказиш бўйича комплекс чора-тадбирларни амалга ошириш юзасидан тақлифлар киритилсин.

4. Ўзбекистон Республикаси Қишлоқ ва сув хўжалиги вазирлиги, Ер ресурслари давлат қўмитаси, Қорақалпоғистон Республикаси Вазирлар Кенгаши, вилоят ҳокимликлари фермер хўжаликлари тузиш ҳамда улар фаолиятини ташкил қилиш жараёнида қуйидаги принципиал қоидаларга амал қилсинлар:

фермер хўжаликлари, қоида тариқасида, тугатиладиган зарар билан ишлаётган, паст рентабелли ва истиқболсиз ширкатлар негизида барпо этилади;

фермер хўжалиги юридик шахс сифатида, асосан хусусий корхона шаклида, кейинчалик улар турли шаклдаги кооперацияларга бирлашиш ҳуқуқи билан барпо қилинади;

ер майдонлари фермерларга танлов асосида эллик йилгача узоқ муддатли асосда, ижара муддати давомида мерос қилиб қолдириш ҳуқуқи билан ижарага фойдаланиш учун берилади;

фермер хўжаликларига берилган ер майдонлари ширкат хўжаликларининг балансидан чиқарилади;

фермер хўжаликларини шакллантириш учун ер майдонлари бериш тартиби Ўзбекистон Республикаси Вазирлар Маҳкамаси томонидан тасдиқланадиган алоҳида Низом билан белгиланади;

етиштириладиган қишлоқ хўжалик маҳсулотларини етказиб бериш ҳамда моддий-техника ресурслари ва хизматларни олиш учун шартномаларни фақат фермер хўжалиklarининг ўзлари тайёрлов, қайта ишлаш ҳамда хизмат кўрсатиш корхоналари ва ташкилотлари билан тўғридан-тўғри тузадилар;

фермер билан ёлланма ходимлар, шу жумладан оила аъзолари ўртасидаги меҳнат муносабатлари амалдаги меҳнат қонунчилигига мувофиқ меҳнат шартномаларига асосланди.

5. Ўзбекистон Республикаси Вазирлар Маҳкамаси Қорақалпоғистон Республикаси Вазирлар Кенгаши ва вилоят ҳокимликлари билан бирга икки ой муддатда қуйидагиларни ишлаб чиқиб, тасдиқласин:

маҳаллий шароитларни, қишлоқ хўжалик ерлари, меҳнат ресурслари мавжудлигини ҳамда ширкатларни қайта ташкил этиш натижасида бўшаб қоладиган ходимларни иш билан таъминлаш истиқболларини чуқур таҳлил этиш асосида вилоят ва туманлар бўйича яқин йилларда фермер хўжалиklarини ривожлантириш Концепцияси;

2003—2005 йилларда қишлоқда замонавий бозор инфратузилмасини комплекс ривожлантириш Дастури.

6. Қишлоқ хўжалик ишлаб чиқаришини бошқариш тизимини тубдан қайта кўриб чиқиш зарур деб ҳисоблансин, бунда Ўзбекистон Республикаси Қишлоқ ва сув хўжалиги вазирлигини тақсимотчилик вазифаларидан озод қилиш ҳамда қишлоқ хўжалиги тармоқларига раҳбарлик қилишнинг маъмурий-бўйрукбозлик усулларида воз кечиш назарда тутилсин.

Қуйидагилар Ўзбекистон Республикаси Қишлоқ ва сув хўжалиги вазирлигининг асосий вазифалари этиб белгилансин:

қишлоқ хўжалигини замонавийлаштириш ва барқарор ривожлантиришга қаратилган ягона агротехника сиёсатини ўтказиш;

замонавий агротехнологияларни такомиллаштириш ва уларни қишлоқ хўжалиги ишлаб чиқариши тармоқларига жорий этиш;

қишлоқ хўжалик товар ишлаб чиқарувчиларига бозор тамойиллари ва механизмлари асосида хизмат кўрсатувчи тармоқлар, бўғинлар ва тузилмалар фаолиятини мувофиқлаштириш;

ирригация тизимларини бошқаришнинг маъмурий-худудий принциpidан ҳавза принциpidа ўтишни кўзда тутувчи сув ресурсларини бошқариш, шунингдек суғорма сувдан фойдаланишда бозор тамойилларини барча даражада тадбиқ қилиш.

7. Ўзбекистон Республикаси Қишлоқ ва сув хўжалиги вазирлиги бошқаруви марказий аппаратининг тузилмасида қуйидаги муаммоларни ҳал этиш бўйича Кенгашлар тузиш мақсадга мувофиқ деб ҳисоблансин:

— пахтачиликни ривожлантириш;

— ғаллачиликни ривожлантириш;

— сабзавот-полиэ экинлари, мева ва узумчиликни ривожлантириш ҳамда уларни комплекс қайта ишлаш;

— чорвачиликни ривожлантириш;

— ер-сув ресурсларидан оқилона фойдаланиш, ирригацияни ривожлантириш ва ер унумдорлигини ошириш;

— қишлоқ хўжалигини механизациялаш ва кимёлаштириш.

Тегишли тармоқларни ислоҳ қилиш ва ривожлантириш, қишлоқ хўжалиги салоҳиятидан самарали фойдаланиш бўйича аниқ тавсиялар ишлаб чиқиш Кенгашларнинг энг муҳим вазифалари этиб белгилансин.

Мазкур Кенгашлар таркибига жамоатчилик асосида етакчи мутахассислар аъзо

бўлиб кирадилар. Кенгашларнинг раислари Ўзбекистон Республикаси Қишлоқ ва сув хўжалиги вазирлиги хайъатининг аъзолари ҳисобланадилар.

Кенгашларнинг барча тавсиялари қишлоқ ва сув хўжалиги вазирлиги хайъатининг мажлисларида муҳокама этилиши лозим, унинг қарорлари ижро этиш учун мажбурий ҳисобланади.

Мазкур Кенгашлар ишчи органларининг вазифалари Ўзбекистон Республикаси Қишлоқ ва сув хўжалиги вазирлигининг тегишли бошқарма ва бўлимлари зиммасига юклатилсин.

8. Ўзбекистон Республикаси Қишлоқ ва сув хўжалиги вазирлиги, Адлия вазирлиги ҳамда Иқтисодиёт вазирлиги бир ой муддатда тегишли ташкилотлар билан бирга қўйидагиларни ишлаб чиқиб, тасдиқлаш учун Вазирлар Маҳкамасига тақдим этсин:

қишлоқ ва сув хўжалиги вазирлиги, унинг вилоят ва туман бўлинмалари тўғрисидаги янги низомлар;

фермер хўжалиги ва қишлоқ хўжалик кооператив (ширкат)нинг янги намунавий уставлари.

Ушбу низомларни тайёрлаш чоғида қишлоқ хўжалик корхоналарининг мустақиллигини кенгайтириш, ҳар бир бошқарув ва хўжалик юритиш субъектининг вазифа ҳамда мажбуриятлари аниқ чегаралаб қўйилиши, ширкат хўжаликларида кадрлар масалаларини ҳал этишнинг демократик шакллари, қишлоқ хўжалик товар ишлаб чиқарувчиларининг жорий фаолиятига маъмурий аралашувга барҳам бериш кўзда тутилсин.

9. Ўзбекистон Республикаси Қишлоқ ва сув хўжалиги вазирлиги, Иқтисодиёт вазирлиги, Молия вазирлиги бир ой муддатда манфаатдор идоралар билан бирга қишлоқ хўжалик маҳсулотлари, моддий-техника ресурсларини етказиб бериш ва хизматлар кўрсатиш бўйича шартномаларни қайта ишлаб чиқсин ҳамда Ўзбекистон Республикаси Адлия вазирлиги билан келишилган ҳолда янги иамунавий шартномаларни белгиланган тартибда тасдиқласин.

Мазкур шартномаларда қўйидагилар кўзда тутилсин:

асосий қишлоқ хўжалик маҳсулоти етиштирувчининг тайёрлов, қайта ишлаш ва хизмат кўрсатиш ташкилотлари билан ишлаб чиқариш муносабатларида устувор мавқеи;

томонларнинг ҳуқуқ ва ўзаро мажбуриятларини аниқ белгилаш;

маҳсулот етказиб бериш, ишлар бажариш, хизмат кўрсатиш ҳамда шартномалар бўйича ўзаро ҳисоб-китобларнинг тартиби ва аниқ муддатларини белгилаш;

шартномавий муносабатлар мазмуни ва моҳиятини бош вазифа — асосий маҳсулот ҳисобланган пахта толаси, дон ва бошқа маҳсулотларни энг кам сарф-харажат билан етиштириш вазифасига эришишга бўйсундириш;

шартнома мажбуриятларининг ижроси учун томонларнинг жавобгарлигини аниқ белгилаб қўйиш.

Мазкур шартномалар агротехника тадбирлари амалга оширила бошлашидан кечи билан 1 ой олдин тузилиши лозимлиги белгилаб қўйилсин.

Ўзбекистон Республикаси Адлия вазирлиги:

қишлоқ хўжалигида шартномалар тузиш ва уларни бажариш чоғида белгиланган норма ҳамда талабларга хўжалик юритувчи субъектларнинг риоя этишлари устидан мунтазам назорат ўрнатсин;

бир ой муддатда, Олий суд ва Олий хўжалик суди билан биргаликда республика минтақаларида қишлоқ хўжалик товар ишлаб чиқарувчиларининг шартномавий ўзаро муносабатлардан келиб чиқадиган манфаатлари ишончли ҳимоя этилишини

таъминлайдиган ҳуқуқий институтларнинг ривожланган тизимини шакллантириш бўйича Вазирлар Маҳкамасига таклифлар киритсин.

10. Ўзбекистон Республикаси Иқтисодиёт вазирлиги, Давлат статистика қўмитаси, Молия вазирлиги, Қишлоқ ва сув хўжалиги вазирлиги, Давлат солиқ қўмитаси бир ой муддатда қишлоқ хўжалик корхоналари фаолиятини баҳолашда статистик ва молиявий кўрсаткичларнинг амалдаги тизимини ўргансинлар ҳамда ана шу асосда уларни тубдан қайта кўриб чиқиш бўйича таклифлар киритсинлар ва бунда бозор иқтисодиёти талабларига мувофиқ уларни қисқартириш ҳамда ягона ҳисобот тизимини яратишни кўзда тутсинлар.

Айни чоғда вазирликлар ва идоралар томонидан барча бошқарув поғоналарида қўшимча ҳисобот шакллари жорий этилишига йўл қўйилмасин.

11. Ўзбекистон Республикаси Адлия вазирлиги Қишлоқ ва сув хўжалиги вазирлиги, Молия вазирлиги, Иқтисодиёт вазирлиги ҳамда бошқа манфаатдор вазирликлар ва идоралар билан биргаликда бир ой муддатда амалдаги қонунчиликка ушбу Фармондан келиб чиқадиган ўзгартириш ва қўшимчалар киритиш тўғрисидаги таклифларни Вазирлар Маҳкамасига тақдим этсин.

12. Мазкур Фармоннинг ижросини назорат қилиш Ўзбекистон Республикаси Президентининг Давлат маслаҳатчиси И. Ҳ. Жўрабеков, Ўзбекистон Республикаси Бош вазирининг ўринбосарлари Р.С. Азимов ва Н.С. Юсупов зиммаларига юкланган.

Ўзбекистон Республикаси Президенти И. КАРИМОВ

Тошкент ш.,
2003 йил 24 март,
ПФ-3226-сон

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

47 2003 йилнинг 1 апрелидан бошлаб уй-жой-коммунал хизматлар ҳақини тўлаш бўйича бериладиган имтиёзлар ўрнига компенсация пул тўловларини жорий этиш тўғрисида

Бозор ислохотларини чуқурлаштириш ва иқтисодиётни эркинлаштириш шароитида аҳолини ижтимоий муҳофаза қилиш борасидаги чора-тадбирларнинг аниқ йўналтирилишини кучайтириш мақсадида:

1. 2003 йилнинг 1 апрелидан бошлаб уй-жой-коммунал хизматлар ҳақини тўлаш бўйича қонунчилик асосида бериладиган имтиёзлар ўрнига энг кам иш ҳақи ҳисобидан табақалаштирилган миқдорларда ойлик компенсация пул тўловлари жорий этилсин (иловага мувофиқ).

2. Уй-жой-коммунал хизматлар ҳақини тўлаш бўйича компенсация пул тўловларининг суммаси меҳнат ҳақи фондига қўшилиши ҳамда иш ҳақи (пенсиялар) тўланадиган муддатларда тўланиши белгилаб қўйилсин.

Ўзбекистон Республикаси Қонун ҳужжатлари тўплами, 2003 й.

3. Республика Давлат бюджети ва бюджетдан ташқари Пенсия жамғармаси маблағлари ушбу Фармонга мувофиқ уй-жой-коммунал хизматлар ҳақини тўлаш бўйича компенсация пул тўловларини жорий этиш билан боғлиқ сарф-харажатларни молиялаш манбаи этиб белгилансин.

4. Ўзбекистон Республикаси Молия вазирлиги Меҳнат ва аҳолини ижтимоий муҳофаза қилиш вазирлиги билан биргаликда бир ҳафта муддатда уй-жой-коммунал хизматлар ҳақини тўлаш бўйича компенсация пул тўловлари механизми тўғрисидаги низомни ишлаб чиқиб, белгиланган тартибда тасдиқласин.

5. 2003 йилнинг 1 апрелидан бошлаб қуйидагилар ўз кучини йўқотган деб ҳисоблансин:

Ўзбекистон Республикаси Президентининг «Коммунал хизмат кўрсатиш соҳасида иқтисодий ислохотларни чуқурлаштиришнинг янги босқичи тўғрисида» 2001 йил 17 апрелдаги ПФ–2832-сон Фармонининг 6-банди ва 3-илоvasи;

Ўзбекистон Республикаси Президентининг «Ядро полигонларида ва бошқа ядровий-радиация объектларида ҳарбий хизматни ўтаган пенсия ёшидаги шахсларни ижтимоий қўллаб-қувватлаш тўғрисида» 2002 йил 30 майдаги ПФ–3079-сон Фармони 1-бандининг учинчи хатбоши ва 4-банди.

6. Ўзбекистон Республикаси Адлия вазирлиги бир ой муддатда:

Ўзбекистон Республикаси Молия вазирлиги, Меҳнат ва аҳолини ижтимоий муҳофаза қилиш вазирлиги ҳамда бошқа тегишли идоралар билан биргаликда қонунчиликка ушбу Фармондан келиб чиқадиган ўзгартириш ва қўшимчалар киритиш тўғрисидаги таклифларни Вазирлар Маҳкамасига тақдим этсин;

вазирликлар ва идораларнинг меъёрий ҳужжатлари мазкур Фармонга мувофиқ ҳолга келтирилишини таъминласин.

7. Ушбу Фармон матбуотда эълон қилинсин.

Ўзбекистон Республикаси Президенти И. КАРИМОВ

Тошкент ш.,
2003 йил 27 март,
ПФ–3227-сон

Ўзбекистон Республикаси
Президентининг 2003 йил 27 мартдаги
ПФ–3227-сон Фармонига
ИЛОВА

Уй-жой-коммунал хизматлар бўйича бериладиган имтиёзлар ўрнига ойлик компенсация пул тўловлари бериладиган имтиёзли тоифадаги шахслар РЎЙҲАТИ

Шахслар тоифалари рўйхати	Ойлик компенсация тўловлари миқдори (энг кам иш ҳақиға нисбатан % ҳисобида)
1. Барча турдаги умумий таълим мактабларининг педагогик маълумотға эга бўлган ўқитувчилари, директорлари, директорнинг ўқув ва маънавий-маърифий ишлар бўйича ўринбосарлари, тарбиячилари, концертмейстерлари.	45
2. Академик лицейлар, касб-хунар коллежлари ва ўрта махсус ўқув юртларининг ўқитувчилари, директорлари, директорнинг ўқув ва маънавий-маърифий ишлар бўйича ўринбосарлари, ишлаб чиқариш таълими устозлари, психологлари, услубийчилари, концертмейстерлари.	45

Ўзбекистон Республикаси Қонун ҳужжатлари тўплами, 2003 й.

Шахслар тоифалари рўйхати	Ойлик компенсация тўловлари миқдори (энг кам иш ҳақиға нисбатан % ҳисобида)
3. «Меҳрибонлик уйлари»нинг педагогик маълумотға эға бўлган тарбиячилари, директорлари, директорнинг ўқув ва маънавий-маърифий ишлар бўйича ўринбосарлари, психологлари.	45
4. Мактабгача тарбия болалар муассасалари ва мактаб-болалар боғчаларининг педагогик маълумотға эға бўлган тарбиячилари, ўқитувчилари, мудирлари, директорлари, директорнинг ўқув ва маънавий-маърифий ишлар бўйича ўринбосарлари, психологлари.	45
5. Мактабдан ташқари болалар муассасаларининг педагогик маълумотға ёки тренерлик иш стажига эға бўлган ўқитувчилари, тарбиячилари, тренер-ўқитувчилари, директорлари, директорнинг ўқув ва маънавий-маърифий ишлар бўйича ўринбосарлари, йўриқчи-услугиётчилари, концертмейстерлари.	45
6. Олий ўқув юртларининг профессор-ўқитувчилар таркиби, ректорлари, таълим, илмий ва маънавий-маърифий ишлар бўйича проректорлари, филиалларнинг директорлари ҳамда директорнинг таълим, илмий ва маънавий-маърифий ишлар бўйича ўринбосарлари, илмий котиблари, ишлаб чиқариш таълими устозлари, ҳисоблаш марказларининг бошлиқлари ва муҳандислари.	45
7. Ушбу рўйхатнинг 1-6-банларида кўрсатилган, камида 10 йил педагогик ва илмий-педагогик иш стажига эға бўлган ходимлар тоифаларига мансуб пенсионерлар.	45
8. Қишлоқ жойларда ва ишчилар шаҳарчаларида ишловчи шифокорлар, провизорлар, ўрта тиббиёт ва фармацевтика ходимлари. Шу соҳада камида 10 йил иш стажига эға бўлган мазкур тоифалардаги шахсларға мансуб пенсионерлар.	45
9. Ўзгалар қарамоғига муҳтож бўлган ёлғиз пенсионерлар.	45
10. 1941-1945 йиллардаги Иккинчи жаҳон уруши ногиронлари, қатнашчилари ва уларға тенглаштирилган шахслар.	45
11. Совет Иттифоқи Қаҳрамонлари, Социалистик Меҳнат Қаҳрамонлари ва Шухрат орденларининг учала даражалари билан мукофотланган шахслар. Фашистлар концлагерларининг собиқ вояға етмаган тутқунлари, Ленинград шаҳри блокадаси даврида ишлаган фуқаролар, кўзи ожиз I гуруҳ ногиронлари, Чернобил ҳалокати оқибатида зиён кўрган фуқаролар, ядро полигонларида ва бошқа ядровий-радиация объектларида ҳарбий хизматни ўтаган пенсия ёшидаги шахслар.	45
12. 1941-1945 йиллар Иккинчи жаҳон уруши давридаги меҳнат фронти қатнашчилари.	18

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

48 Ўзбекистон Республикаси фуқароларини ҳарбий рўйхатга олиш тўғрисидаги низомни тасдиқлаш ҳақида

«Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунини амалга ошириш, фуқароларни ҳарбий рўйхатга олиш тизимини такомиллаштириш мақсадида Вазирлар Маҳкамаси **қарор қилади:**

1. Ўзбекистон Республикаси фуқароларини ҳарбий рўйхатга олиш тўғрисидаги низом иловага мувофиқ тасдиқлансин.

2. Белгилаб қўйилсинки:

ҳарбий хизматга мажбурлар ва чақирилувчиларни ҳарбий рўйхатдан ўтказиш давлатдаги мавжуд ва ҳарбий хизматга яроқли чақирилувчилар ресурсларини ҳисобга олиш ҳамда таҳлил қилишнинг умумдавлат тизими ҳисобланади. Ҳарбий рўйхат ҳарбий хизматга мажбурлар ва чақирилувчиларнинг яшаш, ишлаш ва ўқиш жойида жойлардаги давлат ҳокимияти ва бошқарув органлари, ҳарбий бошқарув маҳаллий органлари, фуқароларнинг ўзини ўзи бошқариш органлари, идоравий мансублиги ва мулкчилик шаклларида қатъи назар, корхоналар, ташкилотлар ва муассасалар, шу жумладан ўқув муассасалари раҳбарлари томонидан юритилади;

ҳарбий хизматга мажбурлар ва чақирилувчиларни ҳарбий рўйхатдан ўтказишни ташкил этиш ва юритиш ишларига умумий раҳбарлик ва назорат Мудофаа вазирлиги томонидан амалга оширилади.

3. Қуйидагилар:

давлатдаги мавжуд ва ҳарбий хизматга яроқли чақирилувчилар ресурсларини ҳисобга олиш ҳамда таҳлил қилиш умумдавлат тизимининг самарали фаолият кўрсатишини таъминлаш;

мавжуд ҳарбий хизматга мажбурлар ва чақирилувчиларнинг миқдор ва сифат таркибини аниқлаш, уларнинг самарали ва оқилона режалаштирилишини ва уруш даврида улардан Қуролли Кучлар ва иқтисодиёт эҳтиёжлари учун фойдаланилишини таъминлаш;

резервдаги ҳарбий хизматга мажбурлар орасидан Қуролли Кучларнинг сафарбарлигини кучайтириш ва кейинчалик уруш даври шароитларида Қуролли Кучларни улар билан тўлдириш учун зарур ҳарбий мутахассисларни тайёрлаш ва резервда сақлаб туриш тадбирларини ишлаб чиқиш ва амалга ошириш ҳарбий рўйхатга олишнинг асосий вазифалари этиб белгилансин.

4. Вазирликлар, давлат қўмиталари ва идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

Ўзбекистон Республикаси фуқароларини ҳарбий рўйхатга олиш тўғрисидаги низом талаблари сифатли ва самарали бажарилишини, ҳарбий хизматга мажбурлар ва чақирилувчиларнинг ҳарбий рўйхатга олиш билан тўлиқ қамраб олиншини таъминласинлар;

2003 йил 1 июнгача ўзларига қарашли корхоналар, ташкилотлар ва муассаса-

лар, шу жумладан таълим муассасалари, туман, шаҳар ҳокимликлари ва фуқароларнинг ўзини ўзи бошқариш органлари штат жадвалларини ўрганиб ва аниқлаб чиқсинлар, ҳарбий ҳисобга олиш ходимлари лавозимлари мавжуд бўлмаган тақдирда уларни Ўзбекистон Республикаси фуқароларини ҳарбий рўйхатга олиш тўғрисидаги низомда белгиланган юклама нормаларига мувофиқ тўлдиришни назарда тутсинлар.

5. Ўзбекистон Республикаси Мудофаа вазирлиги (Қ.Ф. Фуломов):

икки ой муддатда ҳарбий хизматга мажбурлар ва чақирилувчиларни автоматлаштирилган тарзда ҳарбий рўйхатга олишнинг классификаторли тизимини барпо этиш дастурини ишлаб чиқсин, уни рухсатсиз ахборот олиш ва ахборот ошкор бўлишидан ҳимоя қилишни ҳисобга олсин ҳамда унинг 2003–2004 йиллар мобайнида амалга оширилишини таъминласин. Махсус асбоб-ускуналар, техника ва дастурий таъминотни харид қилиш харажатларини 2003 йилда ажратилган маблағ билан таъминлаш лимити доирасида амалга оширсин;

2003 йил 1 июнгача Ўзбекистон Республикаси фуқароларини ҳарбий ҳисобга олишни ташкил этиш ва уни юритиш тартиби масалалари бўйича йўриқномани ишлаб чиқсин ва йўриқнома билан вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларини таъминласин.

6. Ўзбекистон Республикаси Молия вазирлиги (М.Б. Нурмуродов) 2004 йилга бюджет прогнозини шакллантиришда Ўзбекистон Республикаси Мудофаа вазирлигининг асосланган ҳисоб-китобларига кўра ҳарбий хизматга мажбурлар ва чақирилувчиларни автоматлаштирилган тарзда ҳарбий рўйхатга олишнинг классификаторли тизимини барпо этиш учун махсус асбоб-ускуналар, техника ва дастурий таъминотни харид қилиш учун бюджет маблағлари ажратишни назарда тутсин.

7. Мазкур қарорнинг бажарилишини назорат қилиш Ўзбекистон Республикасининг Бош вазири Ў.Т. Султонов ва Ўзбекистон Республикаси Президенти ҳузуридаги Миллий хавфсизлик кенгаши котиби Ғ.Д. Облаяров зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2003 йил 4 март,
119-сон

Вазирлар Маҳкамасининг
2003 йил 4 мартдаги 119-сон қарорига
ИЛОВА

Ўзбекистон Республикаси фуқароларини ҳарбий рўйхатга олиш тўғрисида НИЗОМ

Мазкур Низом ҳарбий хизматга мажбурлар ва чақирилувчиларни ҳарбий рўйхатга олишни ташкил этиш ва унинг шакллари тартибини, шунингдек жойлардаги давлат ҳокимияти ва бошқарув органлари, фуқароларнинг ўзини ўзи бошқариш органлари, ҳарбий бошқарув, корхоналар, ташкилотлар ва муассасаларнинг, шу жумладан таълим муассасалари мансабдор шахсларининг ҳарбий рўйхатга олишни юритиш бўйича мажбуриятларини белгилаб беради.

1. Ҳарбий хизматга мажбурлар ва чақирилувчиларни ҳарбий рўйхатга олиш

давлатдаги мавжуд ва ҳарбий хизматга яроқли чақирилувчилар ресурсларини ҳисобга олиш ва таҳлил қилишнинг умумдавлат тизими ҳисобланади. Ҳарбий хизматга мажбурлар ва чақирилувчиларни ҳарбий рўйхатга олиш «Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунига мувофиқ ташкил этилади ва уларнинг яшаш жойи бўйича юритилади.

Миллий хавфсизлик хизматининг ҳарбий хизматга мажбурларини рўйхатга олиш Ўзбекистон Республикаси Миллий хавфсизлик хизмати Раиси томонидан белгиладиган тартибда амалга оширилади.

Тиббий тайёргарликка ёки Ўзбекистон Республикаси Вазирлар Маҳкамаси томонидан белгиладиган рўйхатдаги тегишли ҳарбий ихтисосликка турдош касб бўйича тайёргарликка эга бўлган аёллар жинсига мансуб шахслар ҳарбий хизматга мажбурлар ҳарбий рўйхатига киритилади.

2. Ҳарбий хизматга мажбурлар ва чақирилувчиларни ҳарбий рўйхатга олиш тизими мамлакатда амал қилувчи паспорт тизими билан боғлиқ ҳолда юритилади. Рўйхатга олиш тизимининг амал қилиши Ўзбекистон Республикаси Мудофаа вазирлиги, Ички ишлар вазирлиги органлари, Қорақалпоғистон Республикаси Вазирлар Кенгаши, вилоятлар, туманлар ва шаҳарлар ҳокимликлари, фуқароларнинг ўзини ўзи бошқариш органлари, шунингдек идоравий мансублилиги ва мулкчилик шаклларида қатъи назар, корхоналар, ташкилотлар, муассасалар, шу жумладан таълим муассасалари томонидан таъминланади.

3. Ҳарбий хизматга мажбурлар ва чақирилувчиларни ҳарбий рўйхатга олиш махсус ва умумий рўйхатларга бўлинади ҳамда жойлардаги давлат ҳокимияти ва бошқарув органлари, фуқароларнинг ўзини ўзи бошқариш органлари, корхоналар, ташкилотлар ва муассасаларнинг, шу жумладан таълим муассасаларининг раҳбарлари томонидан уларнинг яшаш, ишлаш ва ўқиш жойлари бўйича юритилади.

Махсус ҳарбий рўйхатга олиш сафарбарлик даврида ва уруш даврида давлат бошқаруви органлари, корхоналар, ташкилотлар ва муассасалар учун брон қилинган ҳарбий хизматга мажбурларни рўйхатга олиш ва назорат қилиш учун мўлжалланган.

Умумий ҳарбий рўйхатга олиш сафарбарлик даврида ва уруш даврида давлат бошқаруви органлари, корхоналар, ташкилотлар ва муассасалар учун брон қилинмаган чақирилувчилар ва ҳарбий хизматга мажбурларни шахсий рўйхатга олиш ва назорат қилиш учун мўлжалланган. Ҳарбий хизматга мажбурлар ва чақирилувчиларни шахсий рўйхатга олиш туман (шаҳар) мудофаа ишлари органлари, фуқароларнинг ўзини ўзи бошқариш органлари, шунингдек улар ишлайдиган ёки ўқийдиган корхоналар, муассасалар, ташкилотлар ва таълим муассасалари томонидан амалга оширилади.

4. Сафарбарлик чақириқ резерви хизматчиларини ҳарбий рўйхатга олиш мудофаа ишлари бўлимлари томонидан ҳисобга олиш карточкалари алоҳида картотекага ажратилган ҳолда алоҳида амалга оширилади.

Улар 27 ёшга тўлгандан кейин иккинчи тоифали резерв ҳарбий хизматга мажбурларнинг умумий рўйхатига ўтказилади.

Сафарбарлик чақириқ резерви хизматчиси ёки резервнинг ҳарбий хизматга мажбури белгиланган тартибда тинч даврда ҳарбий хизматга яроқсиз, уруш даврида чекланган яроқли деб топилган тақдирда, захирага ўтказилиши керак.

5. Ҳарбий хизматга мажбурлар ва чақирилувчиларни ҳарбий рўйхатга киритиш ва ундан чиқариш тартиби Мудофаа вазирлиги томонидан белгиланади.

Ўзбекистон Республикаси Миллий хавфсизлик хизмати, Давлат чегараларини ҳимоя қилувчи қўмита, Фавқулодда вазиятлар вазирлиги органлари ва ҳарбий ту-

зилмаларига рўйхатга олиш учун берилган, шунингдек Ички ишлар вазирлиги ва Давлат божхона қўмитаси кадрларига ўтказилган ҳарбий хизматга мажбурлар тегишли вазирликлар ва идораларнинг рўйхатида туради.

Улар хизматдан бўшатиладиган кейин бўшатиш пайтидаги лавозимлари ва унвонлари бўйича яшаш жойи бўйича мудофаа ишлари бўлимларига рўйхатга олиш учун берилдилар, Миллий хавфсизлик хизмати органларида хизматни ўтаган шахслар бундан мустасно.

Ўзбекистон Республикаси Миллий хавфсизлик хизмати, Давлат чегараларини ҳимоя қилувчи қўмита, Фавқулодда вазиятлар вазирлиги органларига рўйхатга олиш учун берилётган ҳарбий хизматга мажбурларни, шунингдек Ўзбекистон Республикаси Ички ишлар вазирлиги ва Давлат божхона қўмитаси кадрларига ўтказилган ҳарбий хизматга мажбурларни ҳарбий рўйхатдан чиқариш Ўзбекистон Республикаси Ички ишлар вазири ва Фавқулодда вазиятлар вазирининг, Миллий хавфсизлик хизмати раиси, Давлат чегараларини ҳимоя қилувчи қўмита раиси ва Давлат божхона қўмитаси раисининг буйруғидан кўчирма асосида амалга оширилади.

Ҳарбий хизматга чақирилган ёки кирган шахслар резервдагилар ва захирадагилар ҳарбий рўйхатидан чиқарилади.

Ҳарбий рўйхатдан қуйидагилар чиқарилиши шарт:

тиббий комиссиялар томонидан ҳарбий хизматга яроқсиз деб топилиб, ҳарбий рўйхатдан чиқарилган фуқаролар;

резервда ёки захирада бўлиш ёшининг чегарасига етган фуқаролар;

доимий яшаш учун чет элга жўнаб кетаётган фуқаролар;

вафот этган ёки қонунда белгиланган тартибда бедарак йўқолган деб топилган фуқаролар.

6. Ҳарбий хизматга мажбурлар ва чақирилувчиларни рўйхатга олишни ташкил этиш ва юритиш бўйича ишларга умумий раҳбарлик қилиш, ҳокимликлар, фуқароларнинг ўзини ўзи бошқариш органларида, идоравий мансублилиги ва мулкчилик шаклларида қатъи назар, корхоналар, муассасалар, ташкилотлар ва таълим муассасаларида ушбу ишларнинг ҳолати устидан назорат қилиш Мудофаа вазирлиги томонидан амалга оширилади.

Ўзбекистон Республикаси вазирликлари ва идораларига, Қорақалпоғистон Республикаси Вазирлар Кенгашига, вилоятлар ва Тошкент шаҳар ҳокимликларига ҳарбий хизматга мажбурлар ва чақирилувчиларни шахсий рўйхатга олиш зиммасига юкланган ўзларига қарашли корхоналар, муассасалар, ташкилотлар, таълим муассасалари ва фуқароларнинг ўзини ўзи бошқариш органларида ҳарбий хизматга мажбурлар ва чақирилувчиларни рўйхатга олишнинг ҳолати устидан назорат қилиш вазифаси юкланади.

7. Ўзбекистон Республикаси фуқароларини ҳарбий рўйхатга олишни ташкил этиш ва юритиш тартиби масалалари бўйича йўриқномалар ва бошқа норматив-ҳуқуқий ҳужжатлар, шунингдек рўйхатга олиш ва ҳисобот беришнинг тегишли бланкалари Мудофаа вазирлиги томонидан ишлаб чиқилади ва тасдиқланади ҳамда вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига юборилади, улар ўзларига қарашли корхоналар, муассасалар, ташкилотлар, таълим муассасаларини, туманлар, шаҳарлар ҳокимликларини ва фуқароларининг ўзини ўзи бошқариш органларини ушбу ҳужжатлар ва бланкалар билан таъминлайди.

Миллий хавфсизлик хизматининг ҳарбий хизматга мажбурларини рўйхатга олишни ташкил этиш ва юритиш тартиби масалалари бўйича йўриқномалар ва бошқа норматив-ҳуқуқий ҳужжатлар, шунингдек рўйхатга олиш ва ҳисобот беришнинг

тегишли бланкалари Миллий хавфсизлик хизмати томонидан ишлаб чиқилади ва тасдиқланади.

8. Қуйидагилар:

офицернинг шахсини тасдиқловчи гувоҳнома, контракт бўйича ҳарбий хизматчи гувоҳномаси бланкалари, ҳарбий гувоҳнома, захирадаги офицер гувоҳномаси, қайд этиш гувоҳномаси ва муқобил хизмат хизматчиси гувоҳномаси, шунингдек ҳарбий хизматга мажбурларнинг махсус ҳарбий рўйхатдаги ҳолатини белгиловчи гувоҳномалар ва билдиришномалар бланкалари қатъий ҳисобот бериладиган ҳарбий-ҳисоб ҳужжатлари ҳисобланади. Ҳарбий-ҳисоб ҳужжатлари Ўзбекистон Республикаси Мудофаа вазирлигининг буюртманомалари бўйича Ўзбекистон Республикаси Марказий банки ҳузуридаги «Давлат белгиси» давлат ишлаб чиқариш бирлашмаси корхоналарида қалбакилаштиришга қарши ҳимоя элементларига эга бўлган махсус қоғозда тайёрланади ҳамда Мудофаа вазирлиги томонидан вазирликлар (идоралар)га ҳамда Қорақалпоғистон Республикаси, вилоятлар ва Тошкент шаҳар мудофаа ишлари бошқармаларига юборилади.

Ҳарбий-ҳисоб ҳужжатлари қатъий ҳисобот бериладиган ҳужжатлар тоифаси учун белгиланган тартибда ҳисобга олинади, сақланади ва ҳисобдан чиқарилади.

Офицер шахсини тасдиқловчи гувоҳнома, контракт бўйича ҳарбий хизматчи гувоҳномаси, захирадаги офицер гувоҳномаси, ҳарбий гувоҳнома, қайд этиш гувоҳномаси ва муқобил хизмат хизматчиси гувоҳномаси бланкалар учун ҳақ ундирилмасдан берилади. Йўқотилган, йўқолган ёки яроқсиз ҳолга келган гувоҳномалар ўрнига гувоҳномаларни такроран беришда бланкалар учун ҳақ ундирилади.

Муқобил хизмат хизматчиларига улар хизмат қилган даврда муқобил хизмат хизматчиси гувоҳномаси берилади. Хизмат муддати тамом бўлгач муқобил хизматдан бўшатилганда ёки турли сабабларга кўра муддатидан олдин бўшатилганда уларга ҳарбий гувоҳнома берилади.

9. Ҳарбий хизматга мажбурлар ва чақирилувчиларни туман (шаҳар) мудофаа ишлари органларида, фуқароларнинг ўзини ўзи бошқариш органларида, корхоналар, муассасалар, ташкилотлар ва таълим муассасаларида рўйхатга олиш:

Ўзбекистон Республикаси фуқаролари томонидан умумий ҳарбий мажбурият бажарилишини ва «Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунида белгиланган ҳарбий рўйхатга олиш қоидаларига риоя қилиш назорат қилинишини таъминлаш;

сафарбарлик даврида ва уруш даврида Ўзбекистон Республикаси иқтисодиёти тармоқларига раҳбарлар таркибини, муҳандис-техник ходимларни, малакали ишчиларни брон қилишни ўз вақтида расмийлаштиришни ташкил этиш;

сафарбарлик бўйича чақирилиши керак бўлган мутахассисларни алмаштириш учун зарур кадрлар резервини олдиндан тайёрлаш;

сафарбарлик тадбирларини ўтказишда ҳарбий бошқарув маҳаллий органларига ёрдам бериш мақсадларида юритилади.

10. Мудофаа ишлари органлари ҳарбий хизматга мажбурлар ва чақирилувчиларни яшаш жойлари бўйича ҳарбий рўйхатга олишга, шунингдек фуқароларнинг ўзини ўзи бошқариш органларида, идоровий мансублилиги ва мулкчилик шаклидан қатъи назар, корхоналар, ташкилотлар ва муассасаларда, шу жумладан таълим муассасаларида уни юритишнинг ҳолати ва тартибини назорат қилишга мажбурдирлар.

11. Фуқароларнинг ўзини ўзи бошқариш органлари:

ўзлари хизмат кўрсатадиган ҳудудда яшовчи барча ҳарбий хизматга мажбурлар ва чақирилувчилар тўлиқ ва сифатли рўйхатга олинишини таъминлашга;

ҳарбий хизматга мажбурлар ва чақирилувчиларни бошланғич рўйхатга олиш карточкаларини захирадаги офицерлар гувоҳномалари ва ҳарбий гувоҳномалардаги, қайд этиш гувоҳномалари ва муқобил хизмат хизматчилари гувоҳномаларидаги ёзувлар билан мунтазам равишда солиштиришга ҳамда ушбу карточкаларни бир йилда камида бир марта солиштириш учун туман ва шаҳар мудофаа ишлари бўлимларига тақдим этишга;

ўн кун муддатда ҳарбий рўйхатга олинган ва ундан чиқарилган барча ҳарбий хизматга мажбурлар ва чақирилувчилар тўғрисида туман (шаҳар) мудофаа ишлари органларига хабар беришга мажбурдирлар.

12. Идоравий мансублиги ва мулкчилик шаклларида қатъи назар, корхоналар, муассасалар, ташкилотлар ва таълим муассасалари маъмурияти қуйидагиларга мажбурдир:

мазкур корхона, муассаса, ташкилот ва таълим муассасасининг барча ҳарбий хизматга мажбурлар ва чақирилувчиларини Ўзбекистон Республикаси Мудофаа вазирлиги ва Давлат статистика қўмитаси томонидан белгиланадиган қоидалар ва шакллар бўйича тўлиқ ва сифатли рўйхатга олинишини таъминлаш;

захирадаги офицерлар гувоҳномаларидаги, ҳарбий гувоҳномалардаги, қайд этиш гувоҳномаларидаги ва муқобил хизмат хизматчиларининг гувоҳномаларидаги ёзувларни уларнинг шахсий карточкаларидаги (Т-2-шакл) ёзувлар билан доимий равишда аниқлаштириб бориш ҳамда ушбу карточкаларни солиштириш учун ҳар йили камида бир марта туман ва шаҳар мудофаа ишлари бўлимларига тақдим этиш;

ҳарбий хизматга мажбурлар ва чақирилувчиларнинг оилавий аҳволи, яшаш жойи манзили, хизматдаги мавқеи, умумтаълим ва техник тайёргарлигидаги ўзгаришларни мунтазам равишда ҳисобга олиб бориш ҳамда беш кун муддатда ушбу ўзгаришларни уларнинг шахсий карточкаларига киритиш, бу тўғрида тегишли ҳарбий рўйхатга олиш органларига улар томонидан белгиланадиган муддатларда, лекин ҳар ойда камида бир марта маълум қилиш;

раҳбарлар, муҳандис-техник ходимлар ва малакали ишчилар таркибидаги ҳарбий хизматга мажбурлар сафарбарлик даври ва уруш даври учун Ўзбекистон Республикаси иқтисодиёти тармоқларига брон қилиб қўйилишини ўз вақтида расмийлаштириш;

ишга (ўқишга) янги қабул қилинган ёки ишдан (ўқув юртидан) бўшатирилган барча ҳарбий хизматга мажбурлар ва чақирилувчилар тўғрисида етти кун муддатда мудофаа ишлари бўлимларига хабар қилиш;

фуқароларни ишга (ўқишга) қабул қилишда уларда ҳарбий-ҳисоб ҳужжатлари (ҳарбий хизматга мажбурларда — захирадаги офицер гувоҳномасининг, ҳарбий гувоҳноманинг, чақирилувчиларда эса — қайд этиш гувоҳномаси) мавжудлигини текшириш ҳамда уларнинг ҳарбий ҳисобда туришини аниқлаш. Фуқаролар фақат яшаш жойи бўйича ҳарбий ҳисобга қўйилганидан кейингина ишга (ўқишга) қабул қилинадилар.

13. Юқори органга эга бўлмаган нодавлат сектордаги корхоналар, ташкилотлар ва муассасалар, шу жумладан таълим муассасалари ҳарбий ҳисобни юритиш масалалари юзасидан ўзлари жойлашган ҳудуддаги туман (шаҳар) ҳокимликларига ҳисобот берадилар. Ушбу ҳолларда ҳокимлик уларни ҳарбий хизматга мажбурлар ва чақирилувчиларни ҳарбий рўйхатга олиш бўйича бланкалар, ҳисобот шакллари ва бошқа ҳужжатлар намуналари билан таъминлайди.

Нодавлат сектордаги корхоналар, муассасалар, ташкилотлар ва таълим муассасаларида ҳарбий хизматга мажбурлар ва чақирилувчиларнинг ҳарбий рўйхатга олиш, шунингдек улар бўйича ҳисобот бериш ушбу Низомнинг 12-бандида назарда тутилган қоидалар бўйича амалга оширилади.

14. Жойлардаги давлат ҳокимияти ва бошқарув органлари, фуқароларнинг ўзини ўзи бошқариш органлари, зиммасига ҳарбий ҳисобни юритиш юкланган корхоналар, муассасалар, ташкилотлар ва таълим муассасалари раҳбарлари, ички ишлар, фуқаролик ҳолатларини қайд этиш, суриштирув ва дастлабки тергов органлари, тиббий-меҳнат эксперт комиссиялари, уй-жойлардан фойдаланиш органлари ва уй эгалари «Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунининг 45-моддасига мувофиқ ҳарбий бошқарув маҳаллий органларига уларнинг ишида кўмаклашиши ва Ўзбекистон Республикаси фуқаролари томонидан умумий ҳарбий мажбуриятнинг бажарилишини ва ҳарбий рўйхатга олиш қоидаларига риоя этилишини таъминлаш чора-тадбирларини кўриши шарт.

15. Мудофаа ишлари органлари, ҳокимликлар, фуқароларнинг ўзини ўзи бошқариш органлари, корхоналар, ташкилотлар ва муассасалар, шу жумладан таълим муассасаларидаги ҳарбий рўйхатга олиш ходимлари сони бир ходим ҳисобига юклама нормасидан келиб чиққан ҳолда:

а) мудофаа ишлари бўлимларида:

ҳисобда 1500 нафаргача ҳарбий хизматга мажбурлар бўлганда — ҳисобга олиш ва брон қилиш бўйича бир нафар ходим, ҳисобда 1500 дан 3000 нафаргача ҳарбий хизматга мажбурлар бўлганда — икки нафар ана шундай ходим ва шундан кейинги ҳар 1500 нафар ҳарбий хизматга мажбурлар ва чақирилувчилар ҳисобига — бир нафардан ходим;

б) ҳокимликларда, фуқароларнинг ўзини ўзи бошқариш органларида:

ҳисобда 500 дан 1000 нафаргача ҳарбий хизматга мажбурлар ва чақирилувчилар бўлганда — ҳарбий рўйхатга олиш учун бир нафар штатли ходим, ҳисобда 1000 дан 2000 нафаргача ҳарбий хизматга мажбурлар ва чақирилувчилар бўлганда — икки нафар ана шундай ходим ҳамда шундан кейинги ҳар 1000 нафар ҳарбий хизматга мажбурлар ва чақирилувчилар ҳисобига — бир нафардан ходим;

в) корхоналар, муассасалар, ташкилотлар ва таълим муассасаларида:

ҳисобда 500 дан 2000 нафаргача ҳарбий хизматга мажбурлар ва чақирилувчилар бўлганда — асосий ишидан озод қилинган бир нафар ходим, ҳисобда 2000 дан 4000 нафаргача ҳарбий хизматга мажбурлар ва чақирилувчилар бўлганда — икки нафар ходим, ҳисобда 4000 дан 7000 нафаргача ҳарбий хизматга мажбурлар ва чақирилувчилар бўлганда — уч нафар ходим ва шундан кейинги ҳар 3000 нафар ҳарбий хизматга мажбурлар ва чақирилувчилар ҳисобига — бир нафардан ходим белгиланади.

Ҳокимликлар ва фуқароларнинг ўзини ўзи бошқариш органларининг ҳарбий рўйхатга олиш ходимлари маҳаллий бюджет маблағлари ҳисобига, корхоналар, муассасалар, ташкилотлар ва таълим муассасаларида эса — ўз маблағлари ҳисобига таъминланадилар.

16. Ҳокимликлар, фуқароларнинг ўзини ўзи бошқариш органлари, идоравий мансублилиги ва мулкчилик шаклларида қатъи назар, корхоналар, ташкилотлар ва муассасаларда, шу жумладан таълим муассасаларида ҳисобда 500 нафардан кам ҳарбий хизматга мажбурлар ва чақирилувчилар бўлганда ҳарбий хизматга мажбурлар ва чақирилувчиларни ҳарбий рўйхатга олиш ва брон қилиш ишлари белгиланган тартибда ҳокимлик, фуқароларнинг ўзини ўзи бошқариш органи, корхона, ташкилот ва муассасанинг, шу жумладан таълим муассасасининг ходимларидан бирига ўриндошлик бўйича юкланади.

17. Ҳарбий рўйхатга олиш билан шуғулланувчи ходимларни тайинлаш, алмаштириш ва ишдан бўшатиш тегишли равишда туман (шаҳар) ҳокими, фуқаролар йиғини раиси, идоравий мансублилиги ва мулкчилик шаклларида қатъи назар, корхона,

муассаса, ташкилот ва таълим муассасаси раҳбарлари томонидан мудофаа ишлари бўлимлари бошлиқлари билан келишилган ҳолда амалга оширилади.

18. Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимлари, вазирликлар, идоралар, уюшмалар, концернлар, корпорациялар ва бирлашмалар раҳбарлари:

жойлардаги давлат бошқарув органларида, тасарруфларидаги корхоналар, ташкилотлар, таълим муассасаларида ҳарбий рўйхатга олиш ишларининг аҳволини назорат қилиши;

жойлардаги ҳарбий рўйхатга олиш ишларининг аҳволи масалаларини мунтазам равишда кўриб чиқиши ва уларни яхшилаш чора-тадбирларини кўриши шарт.

19. Ҳарбий рўйхатга олиш бўлимлари, ҳарбий сафарбарлик органлари ходимларидан ҳарбий рўйхатга олиш ва сафарбарлик ишлари билан боғлиқ бўлмаган бошқа вазифаларни бажариш учун фойдаланишга йўл қўйилмайди.

20. Ҳарбий хизматга мажбурлар, чақирилувчилар ва мансабдор шахслар ҳарбий рўйхатга олиш қоидаларини бузганлик учун амалдаги қонун ҳужжатларига мувофиқ жавобгарликка тортиладилар.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

49 Муқобил хизматни ташкил этиш ва Ўзбекистон Республикаси фуқароларининг уни ўташи тартиби тўғрисидаги низомни тасдиқлаш ҳақида

«Умумий ҳарбий мажбурият ва ҳарбий хизмат тўғрисида»ги Қонунга мувофиқ, муқобил хизматни ташкил этиш ва Ўзбекистон Республикаси фуқароларининг уни ўташи тартибини такомиллаштириш мақсадида Вазирлар Маҳкамаси **қарор қилади:**

1. Муқобил хизматни ташкил этиш ва Ўзбекистон Республикаси фуқароларининг уни ўташи тартиби тўғрисидаги низом, шунингдек корхоналари, ташкилотлари ва муассасаларида фуқаролар томонидан муқобил хизмат ўталадиган вазирликлар ва идоралар рўйхати 1 ва 2-иловаларга мувофиқ тасдиқлансин.

2. Ўзбекистон Республикаси Вазирлар Маҳкамасининг «Муқобил хизматни ташкил этиш ва уни ўташ тартиби тўғрисидаги низомни тасдиқлаш ҳақида» 1993 йил 7 июндаги 275-сон қарори (Ўзбекистон Республикаси ҚТ, 1993 й., 6-сон, 21-модда) ўз кучини йўқотган деб ҳисоблансин.

3. Ўзбекистон Республикаси Мудофаа вазирлиги:

норматив ҳужжатларни мазкур қарор талабларига мувофиқлаштирасин;

2004 йил декабргача муқобил хизмат органларини босқичма-босқич тугатсин ва улар фаолиятига раҳбарлик қилишни мудофаа ишлари ҳудудий органларига юклансин.

4. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Ҳ.С. Кароматов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2003 йил 11 март,
128-сон

Вазирлар Маҳкамасининг
2003 йил 11 мартдаги 128-сон қарорига
1-ИЛОВА

Муқобил хизматни ташкил этиш ва Ўзбекистон Республикаси фуқароларининг уни ўташи тартиби тўғрисида НИЗОМ

I. Умумий қоидалар

1. Мазкур Низом Ўзбекистон Республикаси фуқаролари томонидан муқобил хизматни ўташ тартибини, шунингдек, уни ташкил этиш юзасидан жойлардаги давлат ҳокимияти органлари, вазирликлар, идоралар, концернлар, корхоналар, ташкилотлар ва муассасаларнинг вазифаларини белгилайди.

2. Муқобил хизмат фуқароларнинг умумий ҳарбий мажбуриятни бажаришининг чақирув бўйича ҳарбий хизмат ўрнига иқтисодиёт, ижтимоий соҳанинг турли тармоқларида кам малака талаб этиладиган (ёрдамчи) ишларни, шунингдек фалокатлар, ҳалокатлар, табиий офатлар ва бошқа фавқулодда вазиятлар оқибатларини бартараф этиш ишларини бажариш билан боғлиқ бўлган алоҳида туридир.

3. Муқобил хизматга раҳбарликни, уни ўташ устидан назоратни, шунингдек, муқобил хизмат хизматчиларининг ҳуқуқларини ҳимоя қилишни ва ижтимоий кафолатларини таъминлашни тегишли мудофаа ишлари органлари амалга оширдилар.

4. Ўзбекистон Республикаси фуқароларининг муқобил хизматни ўташи Ўзбекистон Республикаси Конституциясига, «Умумий ҳарбий мажбурият ва ҳарбий хизмат тўғрисида»ги Қонунга, мазкур Низомга ва бошқа қонун ҳужжатларига мувофиқ амалга оширилади.

II. Муқобил хизматга чақириш

5. Фуқароларни муқобил хизматга чақириш «Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунига мувофиқ Вазирлар Маҳкамасининг қарори асосида амалга оширилади.

6. Фуқароларни муқобил хизматга чақириш жойлардаги давлат ҳокимияти органларига, туман (шаҳар) чақириқ комиссияларига, ҳокимликларига, шунингдек, тегишли туман (шаҳар) мудофаа ишлари органларига юклатилади.

7. Ўн саккиз ёшдан йигирма етти ёшгача бўлган, ҳарбий рўйхатда турувчи ва хизматга чақирилиши лозим бўлган фуқаролар, агар улар диний таълимоти қурол-ярғондан фойдаланиш ва Қуролли Кучларда хизмат қилишга йўл қўймайдиган, рўйхатга олинган диний ташкилотлар ҳисобида турсалар, муқобил хизмат ҳуқуқига эга.

Муқобил хизматга чақириладиган фуқаролар ўзларининг кўрсатиб ўтилган рўйхатдан ўтказилган диний ташкилотларга мансублилиги тўғрисида маълумотнома тақдим этган ҳолда туман (шаҳар) мудофаа ишлари органларини олдиндан хабардор қиладилар.

8. Муқобил хизматнинг муддати йигирма тўрт ойни, олий маълумотли фуқаролар учун эса ўн саккиз ойни ташкил этади.

9. Муқобил хизматга чақирилувчиларнинг тиббий кўриги Тинч даврда ва уруш даврида Ўзбекистон Республикаси Қуролли Кучларида тиббий кўриқдан ўтказиш тўғрисидаги низомга мувофиқ туман (шаҳар) мудофаа ишлари органи томонидан ташкил этилади ва ўтказилади.

10. Туман (шаҳар) чақирув комиссияси тақдим этилган ҳужжатлар асосида ва тиббий кўрик натижаларига мувофиқ фуқароларни муқобил хизматга чақириш тўғрисида тегишли қарор қабул қилади.

Муқобил хизматни ўтаётган шахслар муқобил хизмат хизматчилари деб юритилади.

Чақириқ санаси ва хизмат ўталаётган жой ҳақидаги белги қўйилган муқобил хизмат хизматчилари гувоҳномаси фуқароларнинг муқобил хизматга муносабатини тасдиқловчи ҳужжат ҳисобланади.

11. Муқобил хизматга чақирилган фуқаро унга хизматни ўташ жойи тайинланганлиги тўғрисидаги ва етиб бориш муддати белгиланган ёзма кўрсатмани олиш учун туман мудофаа ишлари бўлимига белгиланган муддатда етиб келади.

Муқобил хизматга чақирилган фуқароларни ўзларининг яшаш жойларидаги, шунингдек мамлакатнинг бошқа минтақаларидаги корхоналар, ташкилотлар ва муассасаларга юбориш етиб бориш муддати белгиланган ҳолда яқка тартибда амалга оширилади.

Ишга қабул қилинганлик тўғрисида буйруқ чиқарилган кун муқобил хизмат бошланган кун ҳисобланади.

III. Муқобил хизматни ўташ

12. Муқобил хизматни ўташ Вазирлар Маҳкамасининг қарори билан белгиланган вазирликлар, идоралар ва концернларнинг корхоналари, ташкилотлари ва муассасаларида амалга оширилади.

Муқобил хизматни ўтаётган фуқароларга меҳнат тўғрисидаги қонун ҳужжатлари татбиқ этилади. Муқобил хизмат муддати меҳнат стажига қўшилади.

Муқобил хизматни ўтаётган фуқаро раҳбарлик ва сайлаб қўйиладиган лавозимларни эгаллаши, тадбиркорлик фаолияти билан шуғулланиши, таълим муассасаларига ўқишга кириши мумкин эмас.

13. Муқобил хизматни ўтаётган фуқаро уни белгиланган жойда ўташи, қонун ҳужжатларида назарда тутилган талабларга, иш жойида амал қиладиган ички меҳнат тартиби қоидаларига, шунингдек меҳнат шартномаси (контракти) шартларига риоя этиши шарт.

Муқобил хизмат хизматчиларининг корхоналар, ташкилотлар ва муассасаларда меҳнат шартномаси (контракт) тузмасдан меҳнат фаолияти билан шуғулланиши тақиқланади.

14. Муқобил хизматни ўтаётган фуқаролар фалокатлар, ҳалокатлар ва табиий офатлар оқибатларини бартараф қилиш ишларига жалб этилган тақдирда юзага келган вазиятдан келиб чиқадиган ҳамда ана шу оқибатларни бартараф этиш комиссиялари ёки штабларининг жойлардаги раҳбарлари томонидан белгиланадиган махсус вазифаларни бажарадилар.

15. Муқобил хизмат хизматчиларини муқобил хизмат ўталадиган бошқа корхоналар, ташкилотлар, муассасаларга ўтказиш:

ходимлар сони (штати) ўзгаришига ёки иш хусусияти ўзгаришига, ёхуд корxonанинг тугатилишига олиб келган технологиядаги, ишлаб чиқариш ва меҳнатни ташкил этишдаги ўзгаришлар, иш ҳажмларининг қисқариши;

фалокатлар, ҳалокатлар, табиий офатлар ва фавқулодда ходисаларни тугатиш бўйича ишларни бажарувчи корхоналар, ташкилотлар ва муассасаларни бутлаш зарурияти бўлган ҳолларда амалга оширилади.

Бундай ҳолларда бир жойдан иккинчи жойга ўтказиш ҳуқуқи:

туман (шаҳар) доирасида — туман (шаҳар) мудофаа ишлари бўлимининг бошлиғига;

вилоят доирасида — Вилоят мудофаа ишлари бошқармасининг бошлиғига;

республика доирасида — Ўзбекистон Республикаси Қуролли Кучлари Бирлашган штабининг Ташкилий-сафарбарлик бош бошқармасининг бошлиғига берилади.

16. Хизмат даврида муқобил хизмат хизматчилари Мудофаа вазирлиги томонидан белгиланган дастурлар бўйича Ўзбекистон Республикаси Мудофаа вазирлигининг ҳарбий қисмлари ва муассасаларида ўтказиладиган ҳарбий тайёргарлик бўйича ўқув йиғинлари (машғулотлар)га жалб қилинадилар. Ўқув йиғинлари тамом бўлгач муқобил хизмат хизматчилари, ўқитиш дастурига мувофиқ қурол-яроғдан фойдаланиш ва қўллаш билан боғлиқ бўлмаган ҳарбий ҳисобга олиш мутахассислигини оладилар ва ҳарбий қасамёд қиладилар.

Мудофаа ишлари органлари корхоналар, ташкилотлар ва муассасаларнинг раҳбарларини олдиндан ва 1 ойдан кечиктирмай муқобил хизмат хизматчиларини ўқув йиғинларига жалб қилиш ҳақида хабардор қиладилар ва кейинчалик муқобил хизмат хизматчиларини йиғинлар ўтказиладиган жойга юборишни амалга оширадилар.

17. Муқобил хизматни ўтаётганда меҳнат қобилиятини йўқотган фуқаролар ва ҳалок бўлган фуқароларнинг оилалари, шунингдек уларнинг қарамоғида бўлган шахслар қонун ҳужжатларига мувофиқ муддатли ҳарбий хизматдаги ҳарбий хизматчилар учун белгиланган нафақалар ва пенсия таъминоти олиш ҳуқуқига эга.

IV. Муқобил хизматдан бўшатиш

18. Белгиланган хизмат муддатларини ўтаб бўлган муқобил хизмат хизматчилари Ўзбекистон Республикаси Қуролли Кучлари захирасига бўшатиладилар.

Муқобил хизмат хизматчиларини бўшатиш Ўзбекистон Республикаси Вазирлар Маҳкамасининг қарори асосида амалга оширилади.

Фуқаро оилавий аҳволи ўзгарганлиги муносабати билан, агар бу ҳол унга қонун ҳужжатларига мувофиқ чақирилиш муддатини кечиктириш ёки чақирилишдан озод этилиш ҳуқуқини берадиган бўлса, муқобил хизматдан муддатидан олдин бўшатилиши мумкин.

19. Ўзбекистон Республикаси Қуролли Кучлари захирасига бўшатиладиган муқобил хизмат хизматчилари ҳарбий хизматга чақирилган жойдаги туман (шаҳар) мудофаа ишлари бўлимига юбориладилар ва улар уч кун муддатда ҳарбий ҳисобга туришлари шарт.

V. Муқобил хизматни ўташ амалга ошириладиган корхоналар, ташкилотлар, муассасаларнинг мажбуриятлари

20. Қорақалпоғистон Республикаси Вазирлар Кенгаши, вилоят, туман (шаҳар) ҳокимликлари корхоналар, ташкилотлар ва муассасаларга тегишли квоталар белгилайди ва муқобил хизмат хизматчиларини иш билан таъминлайди.

21. Иш берувчилар:

«Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонуни талабларига ва мудофаа ишлари тегишли органи билан тузилган шартнома шартларига қатъий риоя қилишга;

муқобил хизмат қилиш учун келган хизматчилар билан меҳнат шартномаси тузишга;

муқобил хизмат хизматчиларини уставлар, низомлар, ички тартиб-интизом қоидалари, меҳнат ва ўқиш шароитлари билан таништиришга, уларнинг ҳуқуқлари, бурчлари ва жавобгарликларини тушунтиришга;

меҳнатни муҳофаза қилиш ва хавфсизлик техникаси қоидалари юзасидан йўл-йўриқлар кўрсатишга;

муқобил хизмат хизматчиларини Қуролли Кучларда қўлланиладиган ишчи касбларга ўқитишга;

меҳнат ва турмуш шароитлари яратиб беришга, махсус кийим-бош ва асбоблар билан таъминлашга;

текин тиббий хизмат билан таъминлашга;

муқобил хизмат хизматчилари ўртасида тарбиявий ишларни олиб боришга;

мудофаа ишлари фуқароларнинг муқобил хизматга келганликлари тўғрисида хабардор қилишга, хизматчилар томонидан меҳнат тўғрисидаги қонунларнинг бузилиши ва уларнинг узрсиз сабаблар билан хизматга чиқмаслиги ҳоллари тўғрисида хабардор қилишга;

хар ойда Ўзбекистон Республикаси Мудофаа вазирлигининг ҳисоб (бюджетдан ташқари) рақамига муқобил хизмат фаолиятини таъминлаш учун фойдаланиладиган хизматчилар иш ҳақининг 20 фоизини ўтказишга;

тегишли шартномалар билан белгиланадиган миқдорларда муқобил хизмат хизматчиларини ишчи касбларга ўқитиш учун маблағ ажратишга мажбурдир

Вазирлар Маҳкамасининг
2003 йил 11 мартдаги 128-сон қарорига
2-ИЛОВА

**Корхоналари, ташкилотлари ва муассасаларида муқобил
хизматни ўташ амалга ошириладиган вазирликлар ва идоралар
РЎЙХАТИ**

1. Меҳнат ва аҳолини ижтимоий муҳофаза қилиш вазирлиги
2. Қишлоқ ва сув хўжалиги вазирлиги
3. Соғлиқни сақлаш вазирлиги
4. Мудофаа вазирлиги
5. Фавқулодда вазиятлар вазирлиги
6. Ўзбекистон «Ўзкоммунхизмат» агентлиги
7. Ўзбекистон алоқа ва ахборотлаштириш агентлиги
8. Ўзбекистон монтаж ва махсус қурилиш ишлари уюшмаси
9. «Ўзкимёсаноат» давлат-акциядорлик компанияси
10. «Ўзбекистон темир йўллари» давлат-акциядорлик компанияси

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

50 Тадбиркорлик субъектлари — фақат юридик шахслар томонидан қонун ҳужжатларида белгиланган тартибда амалга ошириладиган фаолиятнинг айрим турлари рўйхатига қўшимча киритиш тўғрисида

Вазирлар Маҳкамаси **қарор қилади:**

Вазирлар Маҳкамасининг 2002 йил 5 ноябрдаги 380-сон қарори (Ўзбекистон Республикаси ҚТ, 2002 й., 11-сон, 66-модда) билан тасдиқланган Тадбиркорлик субъектлари — фақат юридик шахслар томонидан қонун ҳужжатларида белгиланган тартибда амалга ошириладиган фаолиятнинг айрим турлари рўйхатига қуйидаги мазмундаги 8-банд қўшилсин:

«8. Умумий овқатланиш соҳасида хизматлар кўрсатиш (уй шароитларида ёки жойлардаги давлат ҳокимияти органлари қарори билан махсус ажратилган жойларда ўтириш ўринлари ташкил этмасдан донали таомларнинг айрим турларини тайёрлаш ва сотиш бўйича хизматлар бундан мустасно)».

Ўзбекистон Республикасининг Бош вазири Ў. СУЛТОНОВ

Тошкент ш.,
2003 йил 11 март,
129-сон

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

51 Солиқлар ва бюджетга мажбурий тўловлар бўйича муддатида тўланмаган солиқларни корхоналар ва ташкилотлар мол-мулки ҳисобидан ундириб олиш тартиби тўғрисидаги низомга ўзгартиришлар киритиш ҳақида

«Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунига мувофиқ Вазирлар Маҳкамаси **қарор қилади:**

Ўзбекистон Республикаси Вазирлар Маҳкамасининг 1996 йил 8 ноябрдаги 387-сон қарори (Ўзбекистон Республикаси ҚТ, 1996 й., 11-сон, 31-модда) билан тасдиқланган Солиқлар ва бюджетга мажбурий тўловлар бўйича муддатида тўланмаган солиқларни корхоналар ва ташкилотлар мол-мулки ҳисобидан ундириб олиш тартиби тўғрисидаги низомга иловага мувофиқ ўзгартиришлар киритилсин.

Вазирлар Маҳкамасининг Раиси И. КАРИМОВ

Тошкент ш.,
2003 йил 12 март,
133-сон

Вазирлар Маҳкамасининг
2003 йил 12 мартдаги 133-сон қарорига
ИЛОВА

**Солиқлар ва бюджетга мажбурий тўловлар бўйича муддатида
тўланмаган солиқларни корхоналар ва ташкилотлар мол-мулки
ҳисобидан ундириб олиш тартиби тўғрисидаги низомга
киритилаётган ўзгартиришлар**

1. 2-банднинг учинчи хатбошидаги «ушбу Низомда» сўзлари «қонун ҳужжатларида» сўзлари билан алмаштирилсин.

2. 3-банднинг учинчи хатбоши қуйидаги таҳрирда баён қилинсин:

«Солиқ органининг муддатида тўланмаган солиқлар ва жарима санкцияларини тўлаш тўғрисидаги ёзма талабномаси олингандан (топширилгандан) сўнг ўн кун мобайнида қарздор корхона томонидан қондирилмаслиги ёки жавобсиз қолдирилиши қарзни қарздор корхонанинг мол-мулки ҳисобидан ундириб олиш тўғрисидаги талаблар билан хўжалик судига ариза бериш учун асос ҳисобланади».

3. 4-банднинг биринчи хатбоши қуйидаги таҳрирда баён қилинсин:

«Муддатида тўланмаган солиқларни ва жарима санкцияларини қарздор корхона мол-мулки ҳисобидан ундириб олиш ҳақидаги ариза солиқ тўловчи ҳисобга қўйилган жойдаги давлат солиқ инспекцияси бошлиғи ёхуд унинг ўринбосари томонидан имзоланади. Аризага қуйидаги ҳужжатлар илова қилинади:».

4. 5-банд қуйидаги таҳрирда баён қилинсин:

«5. Хўжалик суди солиқ органи томонидан тақдим этилган ариза қондирилгандан сўнг ундиришни қарздор корхонанинг мол-мулкига қаратиш тўғрисида қарор қабул қилади.

Хўжалик судининг қарори асосида қарзни қарздор корхонанинг мол-мулкидан ундириб олиш суд ижрочилари томонидан қонун ҳужжатларида белгиланган тартибда амалга оширилади».

5. 6-16-бандлар чиқариб ташлансин.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

**52 Муддатли ҳарбий, муқобил хизматнинг белгиланган
муддатларини ўтаб бўлган фуқароларни бўшатиш
ҳамда навбатдаги чақирув тўғрисида**

[Кўчирма]

«Умумий ҳарбий мажбурият ва ҳарбий хизмат тўғрисида»ги Ўзбекистон Республикаси Қонунига мувофиқ Вазирлар Маҳкамаси **қарор қилади:**

1. Ўзбекистон Республикасининг Қуролли Кучлари сафларидан:

муддатли ҳарбий хизматнинг белгиланган муддатларини ўтаб бўлган фуқаролар — резервга;

муқобил хизматнинг белгиланган муддатларини ўтаб бўлган фуқаролар — захирага бўшатилинсин.

2. 1976–1985 йилларда туғилган, чақирилиш муддатини узайтириш ҳуқуқига эга бўлмаган Ўзбекистон Республикаси фуқаролари 2003 йилнинг апрель–май ойларида муддатли ҳарбий ва муқобил хизматга чақирилсин.

Муддатли ҳарбий хизматни ўташга яроқли ҳамда чақирилиш муддатини кечиктириш ва чақирилишдан озод этилиш ҳуқуқига эга бўлмаган, бироқ ушбу чақирув мобайнида Қуролли Кучлар сафига чақирилмайдиган шахслар сафарбарлик чақируви резерви сафига олинсин.

3. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Ўзбекистон Республикаси Мудофаа вазирлиги билан биргаликда Қуролли Кучларнинг чақирилувчилар билан сифатли бутланишини таъминлаш мақсадида жойлардаги чақирув комиссияларининг ҳар томонлама таъминлашини ва самарали ишлашини ташкил этсинлар.

4. Ўзбекистон Республикаси Соғлиқни сақлаш вазирлиги (Ф.Ф. Назиров) Мудофаа вазирлиги (Қ.Ф. Гуломов) билан биргаликда чақирув участкаларини зарур тиббиёт асбоб-анжомлари ва буюмлари билан таъминласин, чақирилувчиларнинг лаборатория текширувлари сифатли ўтказилишини, уларнинг турли ихтисосликдаги юқори малакали врачлар томонидан ҳар томонлама тиббий текшириб кўрилишини ташкил этсин. Чақирилувчиларни тиббий текширишнинг ҳолислиги, шу жумладан муқобил тиббий комиссияларнинг самарали ишлаши орқали ташкил этилсин.

Вазирлар Маҳкамасининг Раиси И. КАРИМОВ

Тошкент ш.,
2003 йил 13 март,
136-сон

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

53 Республика ихтисослаштирилган тиббиёт марказлари фаолиятини ташкил этиш масалалари тўғрисида

Ўзбекистон Республикаси Президентининг «Соғлиқни сақлаш тизимини янада ислох қилиш чора-тадбирлари тўғрисида» 2003 йил 26 февралдаги ПФ–3214-сон Фармони асосида амалга ошириш юзасидан ва Республика тиббиёт марказлари фаолияти ташкил этилишини таъминлаш, уларнинг моддий-техника базасини мустаҳкамлаш мақсадида Вазирлар Маҳкамаси **қарор қилади:**

1. Республика ихтисослаштирилган тиббиёт марказларининг тузилмасига 1-иловага мувофиқ розилик берилсин.

2. Қуйидагилар:

Республика ихтисослаштирилган урология маркази тўғрисидаги низом 2-иловага* мувофиқ;

* 2-илова берилмайди.

Академик В. Воҳидов номидаги Республика ихтисослаштирилган жарроҳлик маркази тўғрисидаги низом 3-иловага* мувофиқ;

Республика ихтисослаштирилган кўз микрохирургияси маркази тўғрисидаги низом 4-иловага* мувофиқ;

Республика ихтисослаштирилган кардиология маркази тўғрисидаги низом 5-иловага* мувофиқ тасдиқлансин.

3. Ўзбекистон Республикаси Соғлиқни сақлаш вазирлиги:

республика аҳолисига ихтисослаштирилган тиббий хизмат кўрсатиш бўйича кўрсатиб ўтилган Марказлар фаолиятининг мувофиқлаштирилишини таъминласин;

бир ҳафта муддатда — Марказларнинг директорлигига номзодлар юзасидан Вазирлар Маҳкамасига белгиланган тартибда таклифлар киритсин.

4. Республика ихтисослаштирилган тиббиёт марказлари раҳбарлари Ўзбекистон Республикаси Давлат мулки қўмитаси, Молия вазирлиги ва Соғлиқни сақлаш вазирлиги иштирокида икки ҳафта муддатда Марказларнинг меҳнат жамоалари йиғилишлари ўтказилишини таъминласинлар, йиғилишларда Марказлар кенгашлари тўғрисидаги низом ҳамда уларнинг шахсий таркиби, Марказлар фаолиятини тартибга солувчи бошқа зарур ҳужжатлар тасдиқлансин.

5. Ўзбекистон Республикаси Молия вазирлиги ва Соғлиқни сақлаш вазирлиги томонидан ишлаб чиқилган:

Республика марказлари томонидан ташхис қўйиш ва даволаш сифати стандартларига риоя қилган ҳолда аҳолига пулли асосда юқори малакали ихтисослаштирилган тиббий ёрдам кўрсатишнинг Вақтинчалик қоидалари 6-иловага мувофиқ;

Ихтисослаштирилган марказлар томонидан пулли асосда кўрсатиладиган тиббий ёрдам учун тарифларни шакллантириш ва тасдиқлашнинг вақтинчалик тартиби 7-иловага мувофиқ;

Имтиёзли тоифага кирувчи беморларни давлат бюджети маблағлари ҳисобига даволаш қийматини тўлашнинг Вақтинчалик тартиби 8-иловага мувофиқ тасдиқлансин.

Ўзбекистон Республикаси Молия вазирлиги, Соғлиқни сақлаш вазирлиги Республика ихтисослаштирилган тиббиёт марказлари билан биргаликда Марказлар фаолияти мониторинги натижалари бўйича 2003 йил мобайнида Вазирлар Маҳкамасига кўрсатиб ўтилган Вақтинчалик қоидалар ва тартибларга зарур ўзгартириш ва қўшимчалар юзасидан таклифлар киритсинлар.

6. Ўзбекистон Республикаси Молия вазирлиги Соғлиқни сақлаш вазирлиги, Республика ихтисослаштирилган тиббиёт марказлари билан биргаликда икки ҳафта муддатда жорий харажатларга бюджет маблағлари сарфини 2004 йилдан бошлаб босқичма-босқич пасайтириш, шунингдек 2008 йилдан кечикмай ўзини ўзи маблағ билан таъминлаш ва ўзини ўзи қоплашга ўтишни назарда тутган ҳолда Марказларни маблағ билан таъминлаш тартиби ва манбалари тўғрисидаги низомни ишлаб чиқсин ва тасдиқласин.

7. Белгилансинки:

ташқил этиладиган Марказлар қайта ташқил этилаётган тиббиёт муассасаларининг ҳуқуқий ворислари ҳисобланади;

Марказларга берилаётган давлат мулки даромад (фойда) солиғи ва қўшилган қиймат солиғи бўйича солиқ солиш объекти ҳисобланмайди;

Марказларнинг давлат мулки ҳисобланган мол-мулки фақат Ўзбекистон Республикаси Давлат мулки қўмитаси билан келишган ҳолда гаров, алмаштириш ёки олди-сотди мавзуси бўлиши мумкин.

8. Ташқил этилаётган Марказларнинг зарур моддий-техника базасини шакллантириш учун Ўзбекистон Республикаси Давлат мулки қўмитаси:

* 3, 4, 5-иловалар берилмайди.

Тошкент шаҳридаги 15-шаҳар клиник шифохонасининг бинолари, иншоотлари, асбоб-ускуналари ва бошқа мол-мулкни Республика ихтисослаштирилган кардиология маркази балансига;

Тошкент шаҳар шошилинич тиббий ёрдам шифохонасининг бинолари, иншоотлари, асбоб-ускуналари ва бошқа мол-мулкни Республика ихтисослаштирилган кўз микрохирургияси маркази балансига берсин.

9. Ўзбекистон Республикаси Давлат мулки қўмитаси Соғлиқни сақлаш вазирлиги ва Молия вазирлиги билан биргаликда бир ой муддатда:

ташкил этилаётган Марказларнинг мол-мулкни пухта хатловдан ўтказсин, асосий воситалар (тиббийёт муассасаларининг бинолари ва иншоотлари, асбоб-ускуналар, анжомлар, инвентар ва бошқалар) шаклидаги давлат мулки рўйхати ва қийматини, муомаладан ташқари активлар ҳажми ва Марказларнинг устав фондларига ишончли бошқарув ҳуқуқи билан берилаётган инвестиция мақсадлари учун ажратилган давлат бюджети маблағлари ҳажмларини аниқласин;

ҳар бир Марказнинг устав фонди миқдорини, Марказ таъсис этилаётган пайтда давлат мулки ва меҳнат жамоаси улуши миқдорини белгиласин.

10. Ўзбекистон Республикаси Молия вазирлиги Соғлиқни сақлаш вазирлиги ва Давлат мулки қўмитаси билан биргаликда ўтказилаётган эксперимент боришининг таъсирчан мониторингини таъминласин ҳамда натижалар бўйича ҳар йили январь ойида Ўзбекистон Республикаси Вазирлар Маҳкамасига ахборот берсин.

11. Ўзбекистон Республикаси Адлия вазирлиги амалдаги қонун ҳужжатларига мазкур қарордан келиб чиқувчи ўзгартириш ва қўшимчалар тўғрисида икки ҳафта муддатда Вазирлар Маҳкамасига таклифлар киритсин.

12. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосарлари Р.С. Азимов ва Ҳ.С. Кароматов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2003 йил 17 март,
140-сон

Вазирлар Маҳкамасининг
2003 йил 17 мартдаги 140-сон қарорига
1-ИЛОВА

**Республика ихтисослаштирилган тиббийёт марказлари
ТУЗИЛМАСИ**

Т/р	Марказнинг номи	Таркибий бўлинмалар	
		Маслаҳат поликлиникаси (бир кунда қабул қилина- диган мижозлар сони)	Стационар (ўрин)
1.	Республика ихтисослаштирилган урология маркази	300	100
2.	Академик В. Воҳидов номидаги республика ихтисослаштирилган жарроҳлик маркази	300	300
3.	Республика ихтисослаштирилган кўз микрохирургияси маркази	250	70
4.	Республика ихтисослаштирилган кардиология маркази	250	160

Ўзбекистон Республикаси Қонун ҳужжатлари тўплами, 2003 й.

Вазирлар Маҳкамасининг
2003 йил 17 мартдаги 140-сон қарорига
6-ИЛОВА

**Республика марказлари томонидан ташҳис қўйиш ва
даволаш сифати стандартларига риоя қилган ҳолда аҳолига
пулли асосда юқори малакали ихтисослаштирилган
тиббий ёрдам кўрсатишнинг
ВАҚТИНЧАЛИК ҚОИДАЛАРИ**

I. Умумий қоидалар

1. Ушбу Вақтинчалик қоидалар Ўзбекистон Республикаси Президентининг «Соғлиқни сақлаш тизимини янада ислоҳ қилиш чора-тадбирлари тўғрисида» 2003 йил 26 февралдаги ПФ-3214-сон Фармонида мувофиқ ишлаб чиқилган ва республика ихтисослаштирилган тиббий марказлари (кейинги ўринларда матнда Марказлар деб юритилади) томонидан аҳолига пулли асосда юқори малакали ихтисослаштирилган тиббий ёрдам кўрсатиш тартиби ва шартларини белгилайди.

2. Ушбу Вақтинчалик қоидалар фақат Ўзбекистон Республикаси Президентининг юқорида қайд этилган Фармонида мувофиқ тажриба тариқасида ташкил қилинган Марказларга татбиқ этилади.

3. Марказлар томонидан аҳолига тиббий ёрдам ташҳис қўйиш ва даволашнинг Ўзбекистон Республикаси Соғлиқни сақлаш вазирлиги тасдиқлаган, юксак жаҳон талабларига жавоб берадиган стандартларига мувофиқ, пулли асосда кўрсатилади.

4. Марказлар мижозларни қабул қилади ва юқори малакали ихтисослаштирилган тиббий ёрдамга муҳтож беморларни замонавий ташҳис қўйиш ва даволаш асбоб-анжомларидан фойдаланган ҳолда даволайди.

5. Марказлар қуйидаги асосий йўналишлар бўйича тиббий ёрдам кўрсатади:
аҳолини маслаҳат бериш учун қабул қилиш;
лаборатория-ташҳис хизматлари кўрсатиш;
амбулаторияда ёрдам кўрсатиш;
стационарда ёрдам кўрсатиш;
реабилитация ёрдами кўрсатиш.

Тиббий ёрдамнинг юқорида қайд этилган турларини кўрсатиш вақтида қўшимча тиббий сервис хизматлари ҳам кўрсатилиши мумкин.

6. Марказлар ихтисослашувига ва малакали кадрлар, моддий-техника базаси, замонавий, юқори технологияли ташҳис қўйиш ҳамда даволаш анжомлари билан таъминланганлик даражасига кўра тиббий хизматларнинг аниқ рўйхатини, қийматини ва кўрсатилиш шарт-шароитларини белгиланган тартибда мустақил равишда белгилайдилар.

**II. Мижозларни қабул қилиш ва юқори малакали ихтисослаштирилган
тиббий ёрдамга муҳтож беморларни даволаш тартиби**

7. Аҳоли Марказларнинг маслаҳат поликлиникалари томонидан қабул қилинади, уларнинг рўйхатга олиш бўлимлари фуқароларни бепул, тушунарли ва ишончли ахборотлар билан таъминлаши шарт, ахборотларда шифохонанинг жойлашган жойи, иш тартиби, тиббий хизматларнинг қиймати кўрсатилган рўйхати, ушбу хизматларни кўрсатиш ва улардан фойдаланиш шартлари, шунингдек мутахассис шифокорларнинг малакаси тўғрисидаги маълумотлар мавжуд бўлади.

Ўзбекистон Республикаси Қонун ҳужжатлари тўплами, 2003 й.

8. Мижозларни қабул қилишни рўйхатдан ўтказиш Марказларнинг маслаҳат поликлиникалари рўйхатга олиш бўлимларида амалга оширилади, бу ерда ҳар бир мижозга паспорти маълумотлари асосида амбулатория картаси очилади.

9. Тиббий рўйхатга олувчилар биринчи марта келган шахсларни ва амбулатория шароитида тўлиқ даволанишга келган мижозларни алоҳида-алоҳида рўйхатдан ўтказиши керак.

10. Марказларга амбулатория шароитида тўлиқ даволанишга келган шахслар тиббий рўйхатга олувчи томонидан мижознинг амбулатория картасидаги ёзувларга мувофиқ бевосита даволовчи мутахассис шифокорга юборилади.

11. Марказларга биринчи марта келган шахслар белгиланган прејскурант бўйича тиббий рўйхатга олувчи томонидан ёзиб берилган счёт-фактурани тўлагандан кейин маслаҳат олиш учун мутахассис шифокорга юборилади.

Счёт-фактурани тўлаш банк муассасасида ёки Марказларда, назорат-касса аппаратлари қўлланган ва қатъий ҳисобот ҳужжатлари ҳисобланадиган бланкалардан фойдаланган ҳолда амалга оширилади. Мижоз банк томонидан тасдиқланган тўлов топшириқномаси нусхасини ёки чекни (нақд пул билан тўланган тақдирда) рўйхатга олиш бўлимига топширади.

12. Маслаҳат бериш вақтида мутахассис шифокор мижозни дастлабки ташҳисдан ўтишга юборади, ташҳис натижаларига кўра касалликни ва амбулатория ёки стационар шароитида даволаш курсини белгилайди, зарурат бўлганда эса, мижозга тасдиқланган ташҳис кўйиш ва даволаш стандартларига мувофиқ қўшимча ташҳис тартиботини белгилайди.

13. Амбулаторияда ёки стационарда даволаш курсини амалга оширишга қарор қилингандан кейин маслаҳат берувчи мутахассис шифокор мижознинг амбулатория картасини ва ташҳис текширувлари натижаларини рўйхатга олиш бўлими орқали тегишли равишда амбулаторияда даволаш учун Марказ поликлиникасига ёки Марказнинг стационар бўлимига беради.

14. Марказ поликлиникасининг ёки стационар бўлимининг даволовчи мутахассис шифокори маслаҳат берган шифокордан олинган маълумотлар асосида даволаш курсини белгилайди, уни мижознинг амбулатория картасига батафсил ёзади ва пулли тиббий ёрдам кўрсатиш юзасидан шартномани расмийлаштириш учун рўйхатга олиш бўлимига беради.

15. Пулли тиббий ёрдам кўрсатиш юзасидан шартнома ушбу Вақтинчалик қоидаларга иловага мувофиқ шакл бўйича икки ёхуд уч нусхада тузилади, уларни мижоз, унинг ҳомийси (у мавжуд бўлганда) ва Марказ директори ёки мазкур функциялар меҳнат вазифаларига мувофиқ зиммасига юкланган ваколатли шахс имзолайди, шартномалар бир нусхадан мижозга ва унинг ҳомийсига (у мавжуд бўлганда), шунингдек Марказнинг ҳужжатлар йиғма жилдларида сақлаш учун берилади.

Бу ҳолда, фақат юридик шахс — иш берувчи ёки беморни даволаш қийматини мурувват тариқасида тўлаган бошқа ташкилот ҳомий бўлиши мумкин. Бюджет ташкилотлари ўз ходимларининг даволаниш қийматини бюджет маблағлари ҳисобига тўлаши тақиқланади.

16. Мижозга амбулаторияда ёки стационарда тиббий ёрдам ташҳис кўйиш ва даволаш сифатининг тасдиқланган стандартларига мувофиқ кўрсатилади.

17. Ташҳис кўйиш ва даволаш сифатининг тасдиқланган стандартларида назарда тутилмаган қўшимча даволаш ва ташҳис тартиботлари:

мижозда қўшимча касалликлар топилганда, уларнинг ташҳис кўйиш ва даволаш харажатлари келишувга кўра ҳамда мижоз ёхуд унинг ҳомийси ҳисобига қопланганда;

Марказ томонидан кўрсатилган тиббий ёрдам натижасида ёки Марказ мутахас-

сисларининг нотўғри ташҳиси ва хатти-харакатлари туфайли пайдо бўлган, даволаш харажатлари Марказнинг ўз маблағлари ҳисобига қопланадиган асоратлар келиб чиққанда амалга оширилади.

18. Мижоз ёки унинг ҳомийси мижозда қўшимча касалликлар аниқланганлиги туфайли кўрсатилиши зарур бўлган қўшимча тиббий ёрдам ҳажми учун тўловни рад этган тақдирда, мижоз ташҳис қўйиш ва даволаш сифати стандартларига мувофиқ назарда тутилган ва қиймати тўланган тиббий ёрдамни тўлиқ ҳажмда олгандан кейин, Марказ томонидан мижозни шифохонадан чиқариш ёки уни яшаш жойидаги соғлиқни сақлаш муассасасига ўтказиш масаласи қўйилади.

III. Тиббий ёрдам қийматини тўлаш тартиби

19. Марказлар томонидан кўрсатиладиган тиббий ёрдам учун олдиндан тўлиқ тўлаш шартларида, ташҳис ва даволаш сифатининг тасдиқланган тарифлари ва стандартларидан келиб чиққан ҳолда, ҳам нақд маблағлар билан Марказ кассасига, ҳам пул маблағларини Марказнинг бюджетдан ташқари депозит ҳисоб рақамига ўтказиш йўли билан ҳақ тўланади.

20. Аҳолидан нақд маблағларни қабул қилиб олиш бўйича касса операциялари Марказ томонидан Ўзбекистон Республикаси қонун ҳужжатларига мувофиқ амалга оширилади.

IV. Мижозлар тўғрисидаги маълумотларни рўйхатга олиш тартиби

21. Тиббий рўйхатга олувчи мижозларнинг амбулатория карталарини алифбо тартибида (фамилиялар бўйича), мижозларнинг туғилган йили бўйича ажратган ҳолда сақлаши керак.

22. Тиббий рўйхатга олувчи томонидан мижозлардан (уларнинг ҳомийларидан) қабул қилиб олинган тўлов ҳужжатлари нусхалари иш куни давомида Марказнинг бош бухгалтерига топширилади. Марказнинг бош бухгалтери тиббий рўйхатга олувчига белгиланган тартибда рўйхатга олиш бўлимида сақланиши керак бўлган қабул қилиб олинган тўлов ҳужжатлари квитанциялари нусхасини беради, тиббий рўйхатга олувчи, назорат-касса аппарати маълумотлари билан пул ўтказиш бўйича Марказнинг махсус ҳисоб рақамига тушган маблағларни таққослайди.

23. Марказ кўрсатилган пулли тиббий хизматлар натижаларининг статистик ва бухгалтерия ҳисобини юритиши шарт, у талаб қилинадиган ҳисоботни тузади ва уни амалдаги қонун ҳужжатларида белгиланган тартибда ва муддатларда тақдим этади.

V. Истеъмолчининг ҳуқуқлари ва Марказнинг жавобгарлиги

24. Мижозларнинг сифатли тиббий ёрдам олиш ҳуқуқлари «Истеъмолчиларнинг ҳуқуқларини ҳимоя қилиш тўғрисида»ги Ўзбекистон Республикаси Қонуни ва бошқа норматив-ҳуқуқий ҳужжатлар билан ҳимоя қилинади.

25. Тиббий ёрдам кўрсатиш юзасидан тузилган шартномага кўра хизматларни бажариш муддатлари ва сифати бўйича мажбуриятлар Марказ томонидан бажарилмаган тақдирда мижоз ўз танловига кўра:

хизматлар кўрсатишнинг янги муддатини белгилашга;

хизматларнинг бошқа мутахассислар томонидан бажарилишини талаб қилишга;

шартномани бекор қилишга ва кўрилган зарарларнинг қопланишини талаб қилишга ҳақлидир.

26. Мижозлар билан Марказ ўртасида пайдо бўладиган эътирозлар ва низолар томонларнинг келишувига кўра ёки Ўзбекистон Республикасининг амалдаги қонун ҳужжатларига мувофиқ суд тартибида ҳал қилинади.

27. Ташҳис қўйиш ва даволаш сифатининг тасдиқланган стандартларига Марказ томонидан амал қилиниши Ўзбекистон Республикаси Соғлиқни сақлаш вазирлиги томонидан даврий ҳисоботларни таҳлил қилиш ва жойларда режали текширишлар ўтказиш йўли билан назорат қилинади.

28. Марказ директори, шунингдек Марказнинг дахлдор ходимлари ўзларининг айби билан мижозлар саломатлигига етказилган зиён ёки улар нобуд бўлган ҳоллар учун амалдаги қонун ҳужжатларига мувофиқ интизомий, фуқаролик-ҳуқуқий, маъмурий ва жиноий жавобгарликка тортиладилар.

Республика марказлари томонидан
ташҳис қўйиш ва даволаш сифати
стандартларига риоя қилган ҳолда аҳолига
пулли асосда юқори малакали ихтисослаш-
тирилган тиббий ёрдам кўрсатишнинг
Вақтинчалик қоидаларига
ИЛОВА

Пулли тиббий ёрдам кўрсатиш тўғрисида ШАРТНОМА

Тошкент шаҳри _____ й. «__» _____

Республика ихтисослаштирилган _____ маркази номидан Марказ тўғрисидаги низом асосида иш кўрувчи, кейинчалик «Бажарувчи» деб юритилувчи, Марказ директори _____ бир томондан, _____
(Ф. И. О.)

_____ да яшовчи, кейинчалик «Мижоз» деб юритилувчи фуқаро _____

(Ф. И. О., паспорт серияси ва рақами, берилган санаси ва жойи)
иккинчи томондан, _____

(мазкур Шартномага ҳақ тўловчи юридик шахснинг номи)
номидан _____ асосида иш кўрувчи,
(Устав, Низом, ишончнома)

кейинчалик «Ҳомий» деб юритилувчи _____ учинчи
(Ф. И. О., лавозими)

томондан мазкур Шартномани қуйидагилар тўғрисида туздилар.

1. Шартнома мавзуси

1.1. Мазкур Шартнома бўйича Бажарувчи Мижозга қуйида кўрсатилган ҳажмда ва муддатда тиббий хизматлар кўрсатади, Мижоз/Ҳомий (зарур бўлмагани чизилсин) эса мазкур Шартнома барча томонлар томонидан имзоланган пайдан бошлаб ___ кун мобайнида ушбу хизматларга белгиланган тарифлар бўйича олдиндан

ҳақ тўлаш шартларида Бажарувчининг кассасига ёхуд Бажарувчининг _____ даги _____-сон депозит ҳисоб рақамига ҳақ тўлайди.

Тиббий хизматлар рўйхати	Тиббий ходимнинг номи ва илмий даражаси	Бирликлар сони	Бирлик қиймати	Умумий қиймати	Хизматларни бажариш муддатлари
1.					
2.					
Жами:		X	X		

1.2. Хизматлар Бажарувчи ва Мижоз томонидан Хизматларни қабул қилиш-топшириш далолатномаси имзолангандан кейин кўрсатилган деб ҳисобланади.

2. Томонларнинг ҳуқуқ ва мажбуриятлари

2.1. Бажарувчи қуйдагиларга мажбурдир:

а) Мазкур Шартноманинг 1.1-бандида кўрсатилган тиббий хизматларни мазкур Шартномада белгиланган ҳажмлар ва муддатлар доирасида тиббиёт амалиёти, технология ва касб этикасининг юксак даражасида кўрсатиш;

б) счё-фактура билан расмийлаштирилган амалдаги харажатлар натижалари бўйича фойдаланилмай қолган маблағларни Мижозга/Ҳомийга (зарур бўлмагани чизилсин) қайтариш;

в) Мижозга амалда кўрсатилган тиббий хизматлар, фойдаланилган дори-дармонлар ва овқат учун счё-фактурани Мижозга/Ҳомийга бериш;

г) хизматларни қабул қилиш-топшириш далолатномасини ўз вақтида тузиш ва имзолаш;

д) Мижознинг соғлиги ҳолати тўғрисидаги врач сирини ошкор қилмаслик;

е) зарурият бўлганда ёки Мижознинг талабига кўра Мижоз/Ҳомий томонидан қўшимча ҳақ тўланмасдан врачлар консилиумини чақириш;

ж) агар хизматларни кўрсатиш жараёнида Бажарувчи мазкур Шартнома шартларидан хизматлар сифатини ёмонлаштирувчи чекинишларга йўл қўйган бўлса, аниқланган барча нуқсонларни Мижознинг талабига кўра _____ кун мобайнида текин тузатиш;

з) Бажарувчининг ёки Бажарувчи ходимларининг айби билан Мижознинг соғлиғига етказилган зиённи, шунингдек бундай зиён етказилиши натижасида келиб чиққан зарарларни тўлиқ ҳажмда қоплаш;

и) Мижоз ва Ҳомийнинг ҳуқуқларига риоя қилиш.

2.2. Бажарувчи қуйдаги ҳуқуқларга эга бўлади:

а) Мижоздан Бажарувчининг ички тартиб-қоидаларига, даволаш режимига, Бажарувчининг тиббий ходимлари кўрсатмалари ва тайинлашларига риоя қилишни талаб этиш;

б) мазкур Шартноманинг 1.1-бандида назарда тутилган кўрсатиладиган хизматлар қийматига ҳақ тўлаш шартларига риоя қилинмаган тақдирда мазкур Шартномани бир томонлама бекор қилиш;

в) Мижознинг айби билан Бажарувчининг мол-мулки ва ходимларига етказилган зиён ва зарарлар тўлиқ ҳажмда қопланишини талаб қилиш ва Мижоздан олиш.

2.3. Мижоз қуйидагиларга мажбурдир:

- а) Бажарувчининг ички тартиб-қоидаларига, даволаш режимига, Бажарувчининг тиббий ходимлари кўрсатмалари ва тайинлашларига риоя қилиш;
- б) мазкур Шартноманинг 1.1-бандида назарда тутилган шартларда хизматларнинг тўлиқ қийматини Бажарувчига ўз вақтида тўлаш (агар бу мазкур Шартнома бўйича Ҳомийнинг мажбурияти ҳисобланмаса);
- в) хизматларни қабул қилиш-топшириш далолатномасини ўз вақтида имзолаш;
- г) ўзининг айби билан Бажарувчининг мол-мулки ва ходимларига етказилган зиён ва зарарларни тўлиқ ҳажмда қоплаш.

2.4. Мижоз қуйидаги ҳуқуқларга эга бўлади:

- а) мазкур Шартноманинг 1.1-бандида кўрсатилган тиббий хизматларни мазкур Шартномада белгиланган ҳажмлар ва муддатлар доирасида тиббиёт амалиёти, технология ва касб этикасининг юқори даражасида олиш;
- б) тиббий ёрдам кўрсатишнинг тасдиқланган тартиб-қоидалари, ташҳис қўйиш ва даволаш стандартлари, тарифлар билан танишиш;
- в) счёт-фактура билан расмийлаштирилган амалдаги харажатлар натижалари бўйича фойдаланилмай қолган маблағлар қайтарилишини талаб қилиш ва олиш;
- г) ўзига амалда кўрсатилган тиббий хизматлар учун счёт-фактурани, шунингдек хизматларни қабул қилиш-топшириш далолатномаларининг бир нусхасини олиш;
- д) хизматларни қабул қилиш-топшириш далолатномаси мазмунига рози бўлмаган тақдирда, ушбу далолатномани мавжуд мулоҳазаларни ёзма равишда кўрсатган ҳолда имзолаш;
- е) ўзининг соғлиги ҳолати тўғрисидаги врач сирини ошкорлик қилмаслик;
- ж) қўшимча ҳақ тўламасдан врачлар консилиумини чақиришни талаб қилиш;
- з) агар хизматлар кўрсатиш жараёнида Бажарувчи мазкур Шартнома шартларидан хизматлар сифатини ёмонлаштирувчи чекинишга йўл қўйган бўлса, Бажарувчидан барча аниқланган нуқсонларни ____кун мобайнида текин тузатишни талаб қилиш;
- и) Бажарувчининг ёки Бажарувчи ходимларининг айби билан Мижознинг соғлиғига етказилган зиён, шунингдек бундай зиён етказилиши натижасида келиб чиққан барча зарарлар тўлиқ ҳажмда қопланишини талаб қилиш ва Бажарувчидан олиш;
- к) Бажарувчини ____кун олдин ёзма равишда огоҳлантириб, мазкур Шартномани бир томонлама бекор қилиш.

2.5. Ҳомий мазкур Шартноманинг 1.1-банди шартларига мувофиқ хизматларнинг тўлиқ қийматини Бажарувчига ўз вақтида тўлаши **шарт**.

2.6. Ҳомий қуйидаги ҳуқуқларга эга бўлади:

- а) Мижозга амалда кўрсатилган тиббий хизматлар учун счёт-фактурани, шунингдек хизматларни қабул қилиш-топшириш далолатномаларининг бир нусхасини олиш;
- б) тиббий ёрдам кўрсатишнинг тасдиқланган тартиб-қоидалари, ташҳис қўйиш ва даволаш стандартлари, тарифлар билан танишиш;
- в) агар Бажарувчи томонидан қўшимча тиббий хизматлар ва бошқа хизматлар

тайинланган тақдирда, Ҳомийнинг маблағлари ҳисобига бошқа тиббиёт муассасалари томонидан қўшимча маслаҳатлашувлар ўтказилишини талаб қилиш;

г) счёт-фактуралар ва хизматларни қабул қилиш-топшириш далолатномалари билан расмийлаштирилган амалдаги харажатлар натижалари бўйича фойдаланилмай қолган маблағлар қайтарилишини талаб қилиш ва олиш;

д) мазкур Шартнома шартлари Бажарувчининг ёки Бажарувчи ходимларининг айби билан бузилган тақдирда, _____кун олдин Бажарувчини ёзма равишда огоҳлантириб, шартномани бир томонлама бекор қилиш ва тўланган маблағлар қайтарилишини Бажарувчидан талаб қилиш.

3. Томонларнинг жавобгарлиги

3.1. Мазкур Шартнома шартлари бажарилмаганлиги ёхуд зарур даражада бажарилмаганлиги учун томонлар бир-бирининг олдида Ўзбекистон Республикасининг фуқаролик қонун ҳужжатларида назарда тутилган тартибда жавоб берадилар.

3.2. Хизматлар кўрсатишнинг Шартномада белгиланган муддатлари бузилганлиги учун «Истеъмолчиларнинг ҳуқуқларини ҳимоя қилиш тўғрисида»ги Ўзбекистон Республикаси Қонунида белгиланган тартибда ва миқдорда Мижозга муддати ўтказиб юборилганлиги учун жарима тўланади.

3.3. Томонларнинг келишувига кўра муддати ўтказиб юборилганлиги учун тўланадиган жарима Бажарувчи томонидан Мижозга қўшимча хизматлар кўрсатилиши ҳисобига бажарилиши мумкин.

3.4. Муддати ўтказиб юборилганлиги учун жарима тўланиши томонларни мазкур Шартнома бўйича мажбуриятлар бажарилишидан ёки ушбу мажбуриятларнинг улар томонидан йўл қўйилган бузилишларини бартараф этиш мажбуриятидан озод қилмайди.

3.5. Томонларнинг ҳар бири, агар бажармаслик ёки зарур даражада бажармаслик енгиб бўлмайдиган куч оқибатида ёки мазкур Шартномада назарда тутилган ўз мажбуриятлари бошқа томон томонидан бажарилмаслиги ёки ноҳалол бажарилиши сабабли юз берганлигини исбот қилса, мазкур Шартнома бўйича ўз мажбуриятлари бажарилмаганлиги ёки зарур даражада бажарилмаганлиги учун жавобгарликдан озод қилинади.

4. Шартноманинг бошқа шартлари

4.1. Бажарувчи томонидан тиббий хизмат кўрсатилиши ёки Бажарувчи ходимларининг нотўғри ташҳиси ва хулосалари туфайли салбий оқибатлар пайдо бўлган тақдирда, Бажарувчи Мижоз учун қўшимча ташҳис қўйиш ва даволаш ёрдами, дори-дармонлар ва овқат қийматини ўз маблағлари ҳисобидан тўлайди.

4.2. Мижозда қўшимча касалликлар аниқланган тақдирда, Мижозга қўшимча ташҳис қўйиш ва даволаш ёрдами кўрсатиш, дори-дармонлар ва овқат қиймати мазкур Шартномага қўшимча битим асосида Мижоз/Ҳомий томонидан тўланади.

4.3. Мазкур Шартномада тартибга солинмаган масалалар бўйича томонлар Ўзбекистон Республикаси қонун ҳужжатларига амал қиладилар.

5. Низоларни ҳал этиш тартиби

5.1. Мазкур Шартномани бажариш пайтида пайдо бўлиши мумкин бўлган ни-

золар ва келишмовчиликлар имкони борича томонлар ўртасидаги музокаралар йўли билан ҳал этилади.

5.2. Низоларни музокаралар йўли билан ҳал этиш мумкин бўлмаган тақдирда, улар Ўзбекистон Республикаси қонун ҳужжатларига мувофиқ судда кўриб чиқилиши керак.

6. Яқуний қоидалар

6.1. Мазкур Шартномага ҳар қандай ўзгартириш ва қўшимчалар, агар улар ёзма шаклда тузилган бўлса ва томонларнинг бунга вакил қилинган вакиллари томонидан имзоланган бўлса ҳақиқий ва мазкур Шартноманинг ажралмас қисми ҳисобланади.

6.2. Мазкур Шартнома уни барча томонлар имзолаган пайтдан бошлаб кучга киради.

6.3. Мазкур Шартнома ҳар бир томон учун бир нусхадан икки/уч нусхада тузилади. Барча нусхалар ўхшаш ва бир хил юридик кучга эгадир.

7. Томонларнинг юридик манзиллари ва имзолари

БАЖАРУВЧИ Республика Ихтисослаштирилган маркази	МИЖОЗ	ҲОМИЙ
_____	_____	_____
_____	_____	_____
(тўлиқ номи, манзили)	(Ф. И. О.)	(тўлиқ номи, манзили)
х/р № _____	_____	х/р № _____
МФО _____	(паспорт рақами ва серияси, ким томонидан ва қачон берилган)	МФО _____
СИР _____	_____	СИР _____
Директор _____	_____	Раҳбар _____
(Ф. И. О.)	_____	(Ф. И. О.)
М. Ў. _____ имзо	(Яшаш жойи)	М. Ў. _____ имзо

Вазирлар Маҳкамасининг
2003 йил 17 мартдаги 140-сон қарорига
7-ИЛОВА

Ихтисослаштирилган марказлар томонидан пулли асосда кўрсатиладиган тиббий ёрдам учун тарифларни шакллантириш ва тасдиқлашнинг ВАҚТИНЧАЛИК ТАРТИБИ

I. Умумий қоидалар

1. Мазкур Тартиб Ўзбекистон Республикаси Президентининг «Соғлиқни сақлаш тизимини янада ислоҳ қилиш чора-тадбирлари тўғрисида» 2003 йил 26 февралдаги ПФ-3214-сон Фармониغا мувофиқ ишлаб чиқилган ҳамда республика их-

тисослаштирилган марказлари (кейинги ўринларда матнда «Марказлар» деб юритилади) томонидан аҳолига пулли асосда кўрсатиладиган тиббий ёрдам турларига тарифларни шакллантириш, тасдиқлаш ва қўллашнинг асосий қоидалари ва усуллари белгилаб беради.

2. Мазкур Тартиб Ўзбекистон Республикаси Президентининг юқорида қайд этилган Фармонига мувофиқ эксперимент тартибида ташкил этилган Марказларга нисбатан татбиқ этилади.

3. Марказлар жорий таъминотга бюджетдан маблағ билан таъминлаш босқич-ма-босқич қисқартирилиши ва 2008 йилдан кечикмай ўзини ўзи маблағ билан таъминлаш ва ўзини ўзи қоплашга ўтишни ҳисобга олган ҳолда кўрсатиладиган тиббий хизматларнинг барча турларига тарифларни Ўзбекистон Республикаси Монополиядан чиқариш ва рақобатни қўллаб-қувватлаш давлат қўмитаси, Молия вазирлиги ва Соғлиқни сақлаш вазирлиги билан келишган ҳолда мустақил равишда белгилайди.

Марказлар кўрсатилаётган тиббий хизматларнинг ташхис қўйиш ва даволаш сифатининг тасдиқланган стандартларига мувофиқлигини таъминлашлари шарт.

4. Рўйхати Молия вазирлиги ва Монополиядан чиқариш ва рақобатни қўллаб-қувватлаш давлат қўмитаси билан келишган ҳолда Соғлиқни сақлаш вазирлиги томонидан белгиланадиган тиббий ёрдамнинг айрим мураккаб юқори технологияли (қиммат) турларига имтиёзли тарифлар харажатларнинг бир қисмини тегишли йил учун кўрсатилган мақсадлар учун назарда тутилган давлат бюджети маблағлари доирасида бюджетдан ажратиладиган маблағлар ҳисобига қоплаш ҳисобга олинган ҳолда шакллантирилади.

II. Марказлар томонидан пулли асосда кўрсатиладиган тиббий ёрдам учун тарифларни шакллантириш тартиби

5. Марказлар томонидан пулли асосда кўрсатиладиган тиббий ёрдам учун тарифлар тиббий хизматларнинг мазкур тури учун ташхис қўйиш ва даволаш сифатининг тасдиқланган стандартларига, шунингдек Ўзбекистон Республикаси Вазирлар Маҳкамасининг 1999 йил 5 февралдаги 54-сон қарори билан тасдиқланган Маҳсулот (ишлар, хизматлар)ни ишлаб чиқариш ва сотиш харажатлари таркиби ҳамда молиявий натижаларни шакллантириш тартиби тўғрисидаги низомнинг харажатларни маҳсулотлар (ишлар, хизматлар) таннархига киритиш ва молиявий натижаларни шакллантиришга оид талабларини ҳисобга олган ҳолда тиббий хизматлар таннархи калькуляцияси асосида шакллантирилади.

Бунда:

меҳнатга ҳақ тўлашга харажатлар Ягона тариф сеткаси бўйича ҳозирги вақтда амалда бўлган меҳнатга ҳақ тўлаш шартлари ва базавий маошлардан келиб чиқиб қабул қилинади;

дори-дармонларга харажатлар устаманинг чекланган миқдорини 20 фоизгача қўлланилган ҳолда ишлаб чиқарувчиларнинг улгуржи сотиш нархларидан (контракт қиймати ёки импорт бўйича харид) келиб чиқиб қабул қилинади.

6. Марказлар томонидан кўрсатиладиган тиббий хизматлар қиймати:

амалдаги нархлар ва тарифлардан, молиявий нормалар ва нормативлардан келиб чиқиб хизматлар (ишлар, маҳсулотлар) таннархига киритиладиган харажатлардан;

давр харажатларига киритиладиган харажатлардан (маъмурий-бошқарув ходимлари таъминоти ва бошқа операция харажатлари);

чекланган миқдори умуман Марказ бўйича тиббий хизматлар (ишлар, маҳсу-

лотлар) қийматининг 15 фоизи даражасидан ошмаслиги керак бўлган фойда нормасидан келиб чиқиб шакллантирилади.

7. Амалдаги прејскурантларда бажарилиши бир марталик хусусиятга эга бўлган тиббий хизматларнинг айрим турларига тарифлар мавжуд эмаслиги Марказда бундай хизматларни кўрсатиш имконияти мавжуд бўлганда уларни кўрсатишни мижозларга рад этиш учун Марказга асос бўлиб хизмат қилмайди.

Юқорида кўрсатиб ўтилган ҳоллар пайдо бўлган тақдирда Марказ раҳбари кейинчалик Ўзбекистон Республикаси Монополиядан чиқариш ва рақобатни қўллаб-қувватлаш давлат қўмитаси ҳамда Молия вазирлиги билан келишган ҳолда бажарилган тиббий хизматлар тури, ҳажми ва қийматини кўрсатиб бир марталик хусусиятга эга бўлган кўрсатиладиган тиббий хизматларга тарифларни мустақил равишда тасдиқлайди.

8. Тарифларни шакллантиришда Марказлар 2012 йил 31 декабргача бўлган даврда тиббий хизматлар қийматига амалдаги қонун ҳужжатларига мувофиқ солиқлар ва божхона тўловларини тўлиқ миқдорда киритадилар. Бунда бюджетга солиқлар ва божхона тўловлари тўлашдан озод этиш натижасида бўшаб қолган сумма 10 йил мобайнида Ўзбекистон Республикаси Президентининг «Соғлиқни сақлаш тизимини янада ислоҳ қилиш чора-тадбирлари тўғрисида» 2003 йил 26 февралдаги ПФ-3214-сон Фармониға мувофиқ Марказларни ривожлантириш ва жиҳозлашға мақсадли йўналтирилади.

III. Тарифларни белгилаш, тасдиқлаш ва қўллаш тартиби

9. Марказлар кўрсатилаётган тиббий хизматларға ўзлари томонидан ишлаб чиқиладиган тарифларни келишиш учун Ўзбекистон Республикаси Монополиядан чиқариш ва рақобатни қўллаб-қувватлаш давлат қўмитаси, Молия вазирлиги, Соғлиқни сақлаш вазирлигига бажариладиган хизматлар ҳажминини ва бажарилган буюртмалар (хизмат кўрсатилган мижозлар) сонини кўрсатган ҳолда хизматларға тарифларнинг лойиҳалаштирилаётган даражаларини, хизматлар, вақт нормаси, асосий ва қўшимча материаллар сарфи нормасининг тасдиқланган тавсифларини, хизматларнинг мазкур туриға калькуляцияни ҳамда тушунтириш хатини тақдим этадилар.

Тегишли вазирликлар ва идоралар билан келишилгандан кейин Марказлар мазкур Вақтинчалик тартибға иловаға мувофиқ шакл бўйича пуллик тиббий хизматларға нархлар прејскурантларини тасдиқлайдилар.

10. Аҳолиға пуллик тиббий хизматлар кўрсатишда Марказлар белгиланган тартибда тасдиқланган прејскурантлар бўйича нархларни қўллайди.

Марказларнинг пулли тиббий хизматларига нархлар прејскурантлари Марказларнинг маслаҳат поликлиникалари рўйхатға олиш бўлимлари ва кассасида кўзға кўринарли жойға ёпиштириб қўйилади.

11. Кўрсатилаётган пуллик тиббий хизматлар таннархига таъсир кўрсатувчи омиллар ўзгарган тақдирда Марказлар тарифларға белгиланган тартибда тегишли ўзгартиришлар киритади.

IV. Марказлар томонидан кўрсатиладиган пуллик тиббий ёрдам учун тарифлар тўғри қўлланилишини назорат қилиш ва унинг учун жавобгарлик

12. Марказларнинг раҳбарлари хизмат кўрсатиш шаклларидан қатъи назар, мижозларға тиббий хизматлар ўз вақтида, тўлиқ ва сифатли кўрсатилиши, шунинг-

дек пуллик тиббий хизматларга тарифларни шакллантириш тартибига риоя этилиши учун қонун ҳужжатларида белгиланган тартибда шахсан жавоб берадилар.

13. Белгиланган тартибда тасдиқланган тарифлар тўғри қўлланилиши назорат қилиниши Ўзбекистон Республикаси Монополиядан чиқариш ва рақобатни қўллаб-қувватлаш давлат қўмитаси, Молия вазирлиги ва Соғлиқни сақлаш вазирлигига юкланади.

14. Тиббий хизматларнинг айрим турларига янги тарифлар тасдиқлангандан кейин хизматларнинг мазкур турига илгари амал қилган барча вақтинча тарифлар ўз кучини йўқотади.

Ихтисослаштирилган марказлар томонидан пулли асосда кўрсатиладиган тиббий ёрдам учун тарифларни шакллантириш ва тасдиқлашнинг Вақтинчалик тартибига
ИЛОВА

КЕЛИШИЛГАН
Ўзбекистон Республикаси
Молия вазирлиги

ТАСДИҚЛАЙМАН

(Марказнинг номи)

Ўзбекистон Республикаси Монополиядан
чиқариш ва рақобатни қўллаб-қувватлаш
давлат қўмитаси

(Директорнинг имзоси)

200__ йил «__» _____

Ўзбекистон Республикаси
Соғлиқни сақлаш вазирлиги

га

(хизматлар номи)

ПРЕЙСКУРАНТ

_____ дан _____ гача амал қилади

Т/р	Хизматлар номи	Ўлчов бирлиги	Тариф (нарх) — сўм

Масъул _____
(имзо)

Изоҳ:

1. Қўшимча прејскурантга илова сифатида меҳнат ва моддий харажатлар ёйиб кўрсатилган ҳолда режали калькуляция бўлиши керак.

2. Қўшимчаларнинг тартиб рақами Марказнинг тарифлар (нархлар)ни рўйхатдан ўтказиш дафтари бўйича кўрсатилади.

3. Дафтарда қўйидаги устунлар назарда тутилиши керак:
хизматлар номи;

нарх тасдиқланган сана;
буйруқнинг тартиб рақами;
нархнинг амал қилиш муддати;
изоҳ.

4. Келишиб олиш ҳар бир вазирлик ва идорада уч иш кунда амалга оширилади.

Вазирлар Маҳкамасининг
2003 йил 17 мартдаги 140-сон қарорига
8-ИЛОВА

Имтиёзли тоифага кирувчи беморларни давлат бюджети маблағлари ҳисобига даволаш қийматини тўлашнинг ВАҚТИНЧАЛИК ТАРТИБИ

I. Умумий қоидалар

1. Ушбу Вақтинчалик тартиб Ўзбекистон Республикаси Президентининг «Соғлиқни сақлаш тизимини янада ислоҳ қилиш чора-тадбирлари тўғрисида» 2003 йил 26 февралдаги ПФ–3214-сон Фармонида мувофиқ ишлаб чиқилган ва Республика ихтисослаштирилган тиббий марказлари (кейинги ўринларда матнда Марказлар деб юритилади) томонидан тиббий ёрдам кўрсатиш ҳамда имтиёзли тоифага кирувчи шахсларга давлат бюджети ҳисобига кўрсатиладиган тиббий хизматлар қийматини тўлаш масалаларини тартибга солади.

2. Ушбу Вақтинчалик тартибнинг амал қилиши фақат:

Ўзбекистон Республикаси Президентининг юқорида қайд этилган Фармонида мувофиқ тажриба тариқасида ташкил этилган Марказларга;

Ўзбекистон Республикаси Президентининг юқорида қайд этилган Фармонида 2-иловада келтирилган, замонавий, юқори технологияли ташҳис ва даволаш асбоб-анжомлари қўлланилган ҳолда юқори малакали ихтисослаштирилган тиббий ёрдам кўрсатиладиган имтиёзли тоифадаги шахсларга татбиқ этилади.

II. Имтиёзли тоифага кирувчи беморларга тиббий ёрдам кўрсатиш тартиби

3. Имтиёзли тоифага кирувчи шахсларни қабул қилиш Марказларнинг маслаҳат поликлиникалари томонидан соғлиқни сақлашни бошқариш ҳудудий органлари ёки Ўзбекистон Республикаси Соғлиқни сақлаш вазирлиги берган йўлланмалар асосида амалга оширилади.

Марказларда тиббий ёрдам олиш учун бериладиган йўлланма қатъий ҳисобда турадиган ҳужжат ҳисобланади, унинг шакли Ўзбекистон Республикаси Соғлиқни сақлаш вазирлиги томонидан тасдиқланади.

Имтиёзли тоифага кирувчи шахслар йўлланмадан ташқари, шунингдек касаллик тарихидан (амбулатория картасидан) кўчирма ва уларнинг шахсини ҳамда имтиёзли тоифадаги шахслар жумласига мансублигини тасдиқловчи ҳужжатларни ҳам тақдим этишади.

Мазкур ҳужжатлар белгиланган намуна бўйича касаллик тарихи очиш учун асос ҳисобланади.

4. Имтиёзли тоифага кирувчи шахсларга тиббий ёрдам кўрсатиш тартиби Республика марказлари томонидан ташҳис қўйиш ва даволаш сифати стандартларига

риоя қилган ҳолда аҳолига пулли асосда юқори малакали ихтисослаштирилган тиббий ёрдам кўрсатишнинг Вақтинчалик қоидаларига ўхшашдир.

5. Имтиёзли тоифага кирувчи шахсларга тиббий ёрдам бюджет маблағлари ҳисобига, ушбу Вақтинчалик тартибга иловага мувофиқ шакл бўйича Марказ ва миждоз ўртасида тузиладиган шартнома асосида кўрсатилади.

6. Шошилич ёрдамга муҳтож беморлар Марказ Директорининг, у бўлмаганда эса Марказнинг масъул навбатчи врачининг билдиришномаси билан қабул қилинади. Марказлар томонидан шошилич тиббий ёрдам беморларни Шошилич тиббий ёрдам марказларида даволашнинг белгиланган чекланган муддатларига мувофиқ кўрсатилади ва уларнинг шифохонага ётқизилиши кейинчалик белгиланган тартибда Ўзбекистон Республикаси Соғлиқни сақлаш вазирлигида расмийлаштирилади.

III. Бюджет маблағлари миқдорини белгилаш тартиби

7. Давлат бюджети маблағларини олиш учун Марказ томонидан навбатдаги молия йили учун бюджет маблағлари олишга буюртманома тузилади, у қуйидагилардан келиб чиққан ҳолда ҳисоблаб чиқилади:

имтиёзли тоифага кирувчи беморлар поликлиникаларнинг мавжуд ўрин фонди ва қабул қилиш қувватининг 20 фоизига қадар ҳажмда бўлиши;

ташхис қўйиш ва даволаш сифатининг белгиланган тартибда тасдиқланган стандартлари, Марказ томонидан кўрсатиладиган тиббий ёрдамга белгиланган тарифлар, шу жумладан тиббий ёрдамнинг айрим мураккаб, юқори технологияли (кимматли) турларига белгиланган имтиёзли тарифлар — бундай тиббий ёрдам турлари рўйхати ва уларнинг сарф-харажатларини қоплаш миқдорлари Ўзбекистон Республикаси Молия вазирлиги билан келишилган ҳолда Соғлиқни сақлаш вазирлиги томонидан белгиланади;

барча турдаги солиқлар ва божхона тўловларини (божхона расмийлаштируви йиғимларидан ташқари) ҳисоблаш ва давлат бюджетига тўламаслик натижасида бўшайдиган маблағлар ҳажмининг прогноз ҳисоб-китоблари, шунингдек бўшайдиган мазкур маблағларни Марказни ривожлантириш ва замонавий тиббий асбоб-анжомлар билан жиҳозлашга йўналтириш.

8. Навбатдаги йил учун бюджет буюртманомаси Марказ томонидан Ўзбекистон Республикаси Соғлиқни сақлаш вазирлигига жорий йилнинг 1 июнидан кечикмай тақдим этилади. Ўзбекистон Республикаси Соғлиқни сақлаш вазирлиги Марказларнинг бюджет буюртманомаларини кўриб чиқиб, умумлаштиргандан кейин навбатдаги йил учун Марказлар бўйича йиғма бюджет буюртманомасини, Марказлар бўйича харажатларни алоҳида параграф билан ажратган ҳолда, жорий йилнинг 1 июлидан кечикмай Ўзбекистон Республикаси Молия вазирлигига тақдим этади.

9. Марказни жиҳозлаш учун бюджет маблағлари ҳажмини прогнозлаштириш вақтида Марказга берилган солиқ имтиёзлари натижасида бўшайдиган маблағлар суммаси ҳисобга олинади.

10. Ўзбекистон Республикаси Молия вазирлиги навбатдаги молия йили учун давлат бюджети параметрлари қонун ҳужжатларида белгиланган тартибда тасдиқлангандан кейин бир ҳафта муддатда, Марказлар учун бюджет маблағлари ҳажмини ҳар бир Марказ бўйича тақсимлаган ҳолда алоҳида сатр билан Ўзбекистон Республикаси Соғлиқни сақлаш вазирлигига етказилади.

Ўзбекистон Республикаси Соғлиқни сақлаш вазирлиги бюджет маблағлари ҳажмларини, Марказларнинг имтиёзли тоифадаги беморларга (поликлиникаларнинг мавжуд ўрин фонди ва қабул қилиш қувватининг 20 фоизига қадар ҳажмда) бепул

тиббий хизмат кўрсатиш бўйича харажатларини қоплашга ҳамда аҳолига имтиёзли тарифлар бўйича тиббий хизматлар кўрсатиш харажатларини қоплашга мақсадли маблағларни алоҳида сатр билан ажратган ҳолда Марказларга етказди.

11. Марказ ажратилган бюджет маблағлари ва ўз даромадлари доирасида мустақил равишда:

келгуси йил учун бизнес-режани ҳамда даромадлар ва харажатлар сметасини ишлаб чиқади ва тасдиқлайди;

Марказ ходимлари меҳнатига ҳақ тўлаш ва уларни моддий рағбатлантириш тўғрисидаги низомни ишлаб чиқади ва тасдиқлайди;

штат жадвалини тасдиқлайди ҳамда Ягона тариф сеткаси бўйича базавий маошлардан ва миқдори чеклаб қўйилмайдиган устама ҳақдан келиб чиққан ҳолда лавозим маошларини белгилайди.

IV. Марказни давлат бюджети маблағлари билан молиялаштириш тартиби

12. Давлат бюджети маблағлари Ўзбекистон Республикаси Соғлиқни сақлаш вазирлиги томонидан Марказга ҳар ойда, моддалар бўйича тақсимланмасдан алоҳида қаторда ажратилади ҳамда Марказнинг банк муассасасидаги махсус бюджет ҳисоб рақамига ўтказилади. Бюджет маблағларидан:

имтиёзли тоифага кирувчи шахсларга поликлиникаларнинг мавжуд ўрни ва қабул қилиш қувватининг 20 фоизига қадар ҳажмда бепул асосда, юқори малакали ихтисослаштирилган тиббий ёрдам кўрсатиш бўйича Марказ харажатларини қоплаш;

Тиббий ёрдамнинг айрим мураккаб, юқори технологияли (қимматли) турларига Ўзбекистон Республикаси Соғлиқни сақлаш вазирлиги томонидан Молия вазирлиги билан келишган ҳолда белгиланган имтиёзли тарифлар бўйича аҳолига тиббий хизматлар кўрсатиш бўйича Марказ харажатларини қоплаш учун фойдаланилиши мумкин.

13. Беморларга шошилиш тиббий ёрдам кўрсатиш харажатлари имтиёзли тоифага кирувчи шахсларни шифохонага жойлаштиришни Ўзбекистон Республикаси Соғлиқни сақлаш вазирлигида расмийлаштириш (юбориш) йўли билан уларга юқори малакали ихтисослаштирилган бепул тиббий ёрдам кўрсатиш учун ажратиладиган давлат бюджети маблағлари ҳисобига тўланади.

14. Даволанган имтиёзли тоифага кирувчи шахслар ва имтиёзли тарифлар бўйича даволанган аҳолининг ҳақиқий сони учун Марказ ва Ўзбекистон Республикаси Соғлиқни сақлаш вазирлиги ўртасидаги ўзаро ҳисоб-китобларни амалга оширишда амбулаторияда ва стационарда кўрсатилган тиббий ёрдам қиймати ташҳис ва даволаш сифатининг тасдиқланган стандартларидан, амалдаги тарифлардан келиб чиққан ҳолда белгиланади.

15. Ташҳис қўйиш ва даволаш сифатининг тасдиқланган стандартларида назарда тутилмаган қўшимча даволаш ва ташҳис қўйиш тартиботлари, агар уларни амалга ошириш зарурияти мижозда қўшимча касалликлар топилиши туфайли пайдо бўлган тақдирда, давлат бюджети маблағлари ҳисобига молиялаштирилади. Бунда мижознинг қиймати давлат бюджети маблағлари ҳисобига тўланадиган даволанишда бўлишининг чекланган муддати ташҳис ва даволаш сифатининг белгиланган стандартларида белгиланган муддатдан 3 кундан ошмаслиги керак.

Қўшимча даволаш ва ташҳис қўйиш тартиботлари Марказ томонидан кўрсатилган тиббий ёрдам асорати ёки Марказ ходимларининг нотўғри ташҳиси ва хат-

ти-ҳаракати сабабли кўрсатилган тақдирда қўшимча харажатлар Марказнинг ўз маблағлари ҳисобига қопланади.

16. Бюджетдан маблағ ажратиш, молиявий таъминотнинг мустаҳкамланиб бориши, ўзини ўзи маблағ билан таъминлаш ва ўзини ўзи қоплашга эришилишига қараб уни босқичма-босқич қисқартириб бориш ҳисобга олинган ҳолда амалга оширилади.

17. Молия йили охирида бюджет маблағларининг фойдаланилмай қолган суммаси бюджетга олиб қўйилмайди ва Марказ ихтиёрида қолади, улардан келгуси молия йилида:

имтиёзли тоифага кирувчи шахсларга поликлиникаларнинг мавжуд ўрин фонди ва қабул қилиш қувватининг 20 фоизига қадар ҳажмда бепул асосда, юқори малакали ихтисослаштирилган тиббий ёрдам кўрсатиш;

тиббий ёрдамнинг айрим мураккаб, юқори технологияли (қимматли) турлари тарифларини арзонлаштириш;

Марказни ривожлантириш ва жиҳозлаш учун фойдаланиш мумкин.

Ҳ. Ҳисобот бериш

18. Марказ ҳар чорақда, ҳисобот давридан кейинги ойнинг 25-кунидан кечикмай Ўзбекистон Республикаси Соғлиқни сақлаш вазирлигига ва Молия вазирлигига бажарилган тиббий хизматлар ҳажми тўғрисида, беморларни пулли ва имтиёзли тоифалар бўйича ажратган ҳолда ҳисобот тақдим этади.

Беморларнинг имтиёзли тоифасини
давлат бюджети маблағлари ҳисобига
даволаш қийматини тўлашнинг
Вақтинчалик тартибига
ИЛОВА

Имтиёзли тоифага кирувчи беморга давлат бюджети маблағлари ҳисобига тиббий ёрдам кўрсатиш тўғрисида ШАРТНОМА

Тошкент шаҳри _____ й. «___» _____

Республика ихтисослаштирилган _____ маркази номидан Марказ тўғрисидаги низом асосида иш кўрувчи, кейинчалик «Бажарувчи» деб юритилувчи, Марказ директори _____ бир томондан,

(Ф. И. О.)

_____ да яшовчи, кейинчалик «Мижоз» деб юритилувчи фуқаро _____

(Ф. И. О., паспорт серияси ва рақами,

_____ иккинчи томондан, мазкур Шартномани қуйидагилар берилган санаси ва жойи) тўғрисида туздилар.

1. Шартнома мавзуси

1.1. Мазкур Шартнома бўйича Бажарувчи Мижозга қуйида кўрсатилган ҳажмда ва муддатларда тиббий хизматлар кўрсатади, ушбу тиббий хизматлар учун Бажарувчига давлат бюджети маблағлари ҳисобидан ҳақ тўланади.

Тиббий хизматлар рўйхати	Тиббий ходимнинг номи ва илмий даражаси	Бирликлар сони	Бирлик қиймати	Умумий қиймати	Хизматларни бажариш муддатлари
1.					
2.					
Жами:		X	X		

1.2. Хизматлар Бажарувчи ва Мижоз томонидан Хизматларни қабул қилиш-топшириш далолатномаси имзолангандан кейин кўрсатилган деб ҳисобланади.

2. Томонларнинг ҳуқуқ ва мажбуриятлари

2.1. Бажарувчи қуйидагиларга мажбурдир:

а) Мазкур Шартноманинг 1.1-бандида кўрсатилган тиббий хизматларни мазкур Шартномада белгиланган ҳажмлар ва муддатлар доирасида тиббиёт амалиёти, технология ва касб этикасининг юксак даражасида кўрсатиш;

б) хизматларни қабул қилиш-топшириш далолатномасини ўз вақтида тузиш ва имзолаш;

в) Мижознинг соғлиги ҳолати тўғрисидаги врач сирини ошкор қилмаслик;

г) зарурият бўлганда ёки Мижознинг талабига кўра врачлар консилиумини чақириш;

д) агар хизматларни кўрсатиш жараёнида Бажарувчи мазкур Шартнома шартларидан хизматлар сифатини ёмонлаштирувчи чекинишларга йўл қўйган бўлса, аниқланган барча нуқсонларни Мижознинг талабига кўра ___кун мобайнида текин тузатиш;

е) Бажарувчининг ёки Бажарувчи ходимларининг айби билан Мижознинг соғлиғига етказилган зиённи, шунингдек бундай зиён етказилиши натижасида келиб чиққан зарарларни тўлиқ ҳажмда қоплаш;

ж) Мижознинг ҳуқуқларига риоя қилиш.

2.2. Бажарувчи қуйидаги ҳуқуқларга эга бўлади:

а) Мижоздан Бажарувчининг ички тартиб-қоидаларига, даволаш режимига, Бажарувчининг тиббий ходимлари кўрсатмалари ва тайинлашларига риоя қилишни талаб этиш;

б) Мижознинг айби билан Бажарувчининг мол-мулки ва ходимларига етказилган зиён ва зарарлар тўлиқ ҳажмда қопланишини талаб қилиш ва Мижоздан олиш.

2.3. Мижоз қуйидагиларга мажбурдир:

а) Бажарувчининг ички тартиб-қоидаларига, даволаш режимига, Бажарувчининг тиббий ходимлари кўрсатмалари ва тайинлашларига риоя қилиш;

б) хизматларни қабул қилиш-топшириш далолатномасини ўз вақтида имзолаш;

в) ўзининг айби билан Бажарувчининг мол-мулки ва ходимларига етказилган зиён ва зарарларни тўлиқ ҳажмда қоплаш.

2.4. Мижоз қуйидаги ҳуқуқларга эга бўлади:

а) мазкур Шартноманинг 1.1-бандида кўрсатилган тиббий хизматларни мазкур

Шартномада белгиланган ҳажмлар ва муддатлар доирасида тиббиёт амалиёти, технология ва касб этикасининг юқори даражасида олиш;

б) тиббий ёрдам кўрсатишнинг тасдиқланган тартиб-қоидалари, ташҳис қўйиш ва даволаш стандартлари ва тарифлар билан танишиш;

в) хизматларни қабул қилиш-топшириш далолатномаси мазмунига рози бўлмаган тақдирда, ушбу далолатномани мавжуд мулоҳазаларни ёзма равишда кўрсатган ҳолда имзолаш;

г) ўзининг соғлиги ҳолати тўғрисидаги врач сирини ошкор қилмаслик;

д) врачлар консилиумини чақиришни талаб қилиш;

е) агар хизматлар кўрсатиш жараёнида Бажарувчи мазкур Шартнома шартларидан хизматлар сифатини ёмонлаштирувчи чекинишга йўл қўйган бўлса, Бажарувчидан барча аниқланган нуқсонларни ____кун мобайнида текин тузатишни талаб қилиш;

ж) Бажарувчининг ёки Бажарувчи ходимларининг айби билан Мижознинг соғлиғига етказилган зиён, шунингдек бундай зиён етказилиши натижасида келиб чиққан барча зарарлар тўлиқ ҳажмда қопланишини талаб қилиш ва Бажарувчидан олиш;

з) Бажарувчини ____кун олдин ёзма равишда огоҳлантириб, мазкур Шартномани бир томонлама бекор қилиш.

3. Томонларнинг жавобгарлиги

3.1. Мазкур Шартнома шартлари бажарилмаганлиги ёхуд зарур даражада бажарилмаганлиги учун томонлар бир-бирининг олдида Ўзбекистон Республикасининг фуқаролик қонун ҳужжатларида назарда тутилган тартибда жавоб берадилар.

3.2. Хизматлар кўрсатишнинг шартномада белгиланган муддатлари бузилганлиги учун Мижозга «Истеъмолчиларнинг ҳуқуқларини ҳимоя қилиш тўғрисида»ги Ўзбекистон Республикаси Қонунида белгиланган тартибда ва миқдорларда муддати ўтказиб юборилганлиги учун жарима тўланади.

3.3. Томонларнинг келишувига кўра муддати ўтказиб юборилганлиги учун жарима Бажарувчи томонидан Мижозга қўшимча хизматлар кўрсатилиши ҳисобига бажарилиши мумкин.

3.4. Муддати ўтказиб юборилганлиги учун жарима тўланиши томонларни мазкур Шартнома бўйича мажбуриятлар бажарилишидан ёки ушбу мажбуриятларнинг улар томонидан йўл қўйилган бузилишларини бартараф этиш мажбуриятидан озод қилмайди.

3.5. Томонларнинг ҳар бири, агар бажармаслик ёки зарур даражада бажармаслик енгиб бўлмайдиган куч оқибатида ёки мазкур Шартномада назарда тутилган ўз мажбуриятлари бошқа томон томонидан бажарилмаслиги ёки ноҳалол бажарилиши сабабли юз берганлигини исбот қилса, мазкур Шартнома бўйича ўз мажбуриятлари бажарилмаганлиги ёки зарур даражада бажарилмаганлиги учун жавобгарликдан озод қилинади.

4. Шартноманинг бошқа шартлари

4.1. Мижоз учун қўшимча ташҳис қўйиш ва даволаш ёрдами кўрсатиш, агар санаб ўтилганлар Бажарувчи томонидан тиббий хизмат кўрсатилиши туфайли пайдо бўлган асоратлар ёки Бажарувчи ходимларининг нотўғри ташҳис қўйиши ва хатти-ҳаракатлари муносабати билан талаб этилса, уларнинг қийматини Бажарувчи ўз маблағлари ҳисобидан тўлайди.

4.2. Мижоз учун қўшимча ташҳис қўйиш ва даволаш ёрдами кўрсатиш қиймати, агар юқорида санаб ўтилганлар Мижозда қўшимча касалликлар аниқланиши муносабати билан талаб этилса, мазкур Шартномага қўшимча битим асосида Марказга ажратилган бюджет маблағлари доирасида бюджет маблағлари ҳисобига тўланади.

4.3. Мазкур Шартномада тартибга солинмаган масалалар бўйича томонлар Ўзбекистон Республикаси қонун ҳужжатларига амал қиладилар.

5. Низоларни ҳал этиш тартиби

5.1. Мазкур Шартномани бажариш пайтида пайдо бўлиши мумкин бўлган низолар ва келишмовчиликлар имкони борича томонлар ўртасидаги музокаралар йўли билан ҳал этилади.

5.2. Низоларни музокаралар йўли билан ҳал этиш мумкин бўлмаган тақдирда, улар Ўзбекистон Республикаси қонун ҳужжатларига мувофиқ судда кўриб чиқиши керак.

6. Якуний қоидалар

6.1. Мазкур Шартномага ҳар қандай ўзгартириш ва қўшимчалар, агар улар ёзма шаклда тузилган бўлса ва томонларнинг бунга вакил қилинган вакиллари томонидан имзоланган бўлса, ҳақиқий ва мазкур Шартноманинг ажралмас қисми ҳисобланади.

6.2. Мазкур Шартнома уни барча томонлар имзолаган пайдан бошлаб кучга киради.

6.3. Мазкур Шартнома ҳар бир томон учун бир нусхадан икки нусхада тузилади. Барча нусхалар ўхшаш ва бир хил юридик кучга эгадир.

7. Томонларнинг юридик манзиллари ва имзолари

БАЖАРУВЧИ	МИЖОЗ
_____	_____
_____	_____
республика ихтисослаштирилган _____	(Ф. И. О.)
_____ маркази	_____
(тўлиқ номи, манзили)	_____
х/р № _____	(паспорт рақами ва серияси, ким томонидан ва қачон берилган)
МФО _____	_____
СИР _____	_____
Директор _____	(йўлланманинг рақами ва санаси, йўлланмани берган орган)
(Ф. И. О.)	_____
М. ў. _____ имзо	(шахснинг имтиёзли тоифага тегишлилигини тасдиқловчи ҳужжатнинг рақами ва берилган санаси)
_____	_____
_____	(Яшаш жойи)

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

54 Судлар ва адлия органларини ривожлантириш жамғармасини ташкил этиш тўғрисида

Судлар ва адлия органларининг моддий-техника таъминотини яхшилаш, улар фаолияти учун зарур шарт-шароитлар яратиш мақсадида, шунингдек амалдаги Судлар ва адлия органларини ривожлантириш, Ижро ишини ривожлантириш жамғармалари маблағларидан фойдаланиш самарадорлигини ошириш учун Вазирлар Маҳкамаси **қарор қилади:**

1. Ўзбекистон Республикаси Судлари ва адлия муассасаларини ривожлантириш, Ўзбекистон Республикаси Хўжалик судларини ривожлантириш, Ижро ишини ривожлантириш жамғармалари негизда ягона Судлар ва адлия органларини ривожлантириш жамғармаси (кейинги ўринларда Жамғарма деб юритилади) ташкил этилсин.

2. Белгилансинки, қуйидагилар Жамғарма даромадларини шакллантириш манбалари ҳисобланади:

умумий юрисдикция судлари томонидан кўриб чиқиладиган ишлар бўйича жарималар ва давлат божлари тўлашдан давлат бюджетига тушаётган суммаларнинг 20 фоизи миқдоридagi ажратмалар;

хўжалик судлари томонидан кўриб чиқиладиган ишлар бўйича давлат божлари ва жарима санкцияларини тўлашдан давлат бюджетига тушаётган суммаларнинг 15 фоизи миқдоридagi ажратмалар;

адлия органлари, шу жумладан ФХДЁ органлари томонидан ундириладиган давлат божи суммаларидан 20 фоиз, давлат нотариуслари томонидан ундириладиган давлат божи суммаларидан эса 15 фоиз миқдоридagi ажратмалар;

адлия органлари томонидан нодавлат нотижорат ташкилотларни, адвокатлик бюроларини, фирмаларни, ҳайъатларни, хусусий нотариал идораларни рўйхатдан ўтказганлик, нотариал ва адвокатлик фаолиятини лицензиялаганлик, юридик кадрларни малака аттестациясидан ўтказганлик учун ундириладиган маблағлар, шунингдек адлия органлари томонидан ўз ваколатлари доирасида ундириладиган жарималар;

ижро иши бўйича бюджетга ундирилган суммадан 30 фоиз миқдоридagi ажратмалар;

ваколатли органлар томонидан олиб қўйилган ва давлат даромадига ўтказилган мол-мулкни сотишдан тушадиган маблағларнинг 10 фоизи;

қонун ҳужжатларида тақиқланмаган бошқа даромадлар.

3. Белгилаб қўйилсинки, умумий юрисдикция судлари биноларини қуриш ва таъмирлаш, уларни зарур анжомлар, компьютерлар ва бошқа замонавий ташкилий-техника воситалари билан таъминлаш Жамғарманинг биринчи навбатдаги вазифаси ҳисобланади.

Жамғарма маблағлари шунингдек:

хўжалик судларини ва адлия органларини, шу жумладан нотариатни, ФХДЁни ва суд ижрочиларини моддий-техник таъминлашга;

судлар ва адлия органлари ходимларига малака класслари, даражалари ва муайян вақт давомида ишлаганлиги учун устама ва қўшимча ҳақ тўлашга, уларнинг малакасини оширишга, кадрларни ўқитишга;

судлар ва адлия органлари ходимларини ижтимоий муҳофаза қилишга;

судлар ва адлия органлари фаолиятини яхшилашга қаратилган бошқа тадбирларга йўналтирилади.

4. Судлар ва адлия органларини ривожлантириш жамғармаси тўғрисидаги низом ва уни бошқариш тузилмаси 1 ва 2-иловаларга мувофиқ тасдиқлансин.

5. Белгилансинки, Жамғарма фаолиятини бошқариш ва унинг маблағларини тақсимлаш Ўзбекистон Республикаси Адлия вазири бошқарадиган Кузатувчи кенгаш томонидан амалга оширилади.

Кузатувчи кенгаш таркибига лавозимига кўра Олий суд ва Олий хўжалик суди раислари, Ўзбекистон Республикаси Адлия вазирлиги хузуридаги Суд қарорларини ижро этиш, судлар фаолиятини моддий-техника жиҳатидан ва молиявий таъминлаш департаменти директори ва Жамғарманинг ижро этувчи директори киради.

6. Белгилаб қўйилсинки, Жамғарма маблағларини тўплаш ва сарфлашни тезкор бошқариш 4 кишидан иборат таркибдаги, Жамғарма маблағлари ҳисобидан маблағ билан таъминланадиган Жамғарма ижро этувчи дирекцияси томонидан амалга оширилади.

Жамғарма ижро этувчи дирекциясини Ижро этувчи директор бошқаради, у Жамғарма Кузатувчи кенгаши томонидан лавозимга тайинланади ва лавозимдан озод қилинади.

Жамғарма ижро этувчи директори Жамғарма маблағларидан белгиланган мақсадда фойдаланилиши учун шахсан жавоб беради.

Жамғарманинг Кузатувчи кенгаши бир ой муддатда Жамғарма ижро этувчи дирекциясини жойлаштирилишини ва бутланишини, шунингдек Жамғарма фаолиятининг бошқа ташкилий-техник масалалари ҳал этилишини таъминласин.

7. Ўзбекистон Республикаси Молия вазирлиги (М. Нурмуродов) Жамғарма маблағларидан мақсадли фойдаланилиши устидан қатъий назоратни амалга оширсин.

8. Ўзбекистон Республикаси Адлия вазири А. Полвон-зода йилнинг ҳар чорагида Ўзбекистон Республикаси Президенти девонига Жамғарма маблағларидан фойдаланилиши тўғрисида ҳисобот тақдим этсин.

9. Қуйидагилар:

Ўзбекистон Республикаси Вазирлар Маҳкамасининг «Адлия вазирлиги фаолиятини такомиллаштириш масалалари тўғрисида» 1992 йил 12 ноябрдаги 523-сон қарорига 3-илова (Ўзбекистон Республикаси ҚТ, 1992 й., 11-сон, 32-модда);

Ўзбекистон Республикаси Вазирлар Маҳкамасининг «Ўзбекистон Республикасининг Хўжалик судларини ривожлантириш жамғармаси тўғрисида» 1993 йил 4 мартдаги 124-сон қарори;

Ўзбекистон Республикаси Вазирлар Маҳкамасининг «Ўзбекистон Республикаси Президентининг «Хўжалик юритувчи субъектларнинг иқтисодий ночорлиги ва шартнома мажбуриятларининг бажарилиши учун мансабдор шахсларнинг жавобгарлигини кучайтириш тўғрисида» 1998 йил 4 мартдаги ПФ-1938-сон Фармонининг бажарилишини таъминлаш чора-тадбирлари ҳақида» 1998 йил 24 апрелдаги 177-сон қарорининг 8-банди (Ўзбекистон Республикаси ҚТ, 1998 й., 4-сон, 17-модда);

Ўзбекистон Республикаси Вазирлар Маҳкамасининг «Ўзбекистон Республикаси умумий юрисдикция судларининг моддий-техника таъминотини яхшилаш чора-тадбирлари тўғрисида» 2000 йил 15 августдаги 321-сон қарорининг 5-банди;

Ўзбекистон Республикаси Вазирлар Маҳкамасининг «Ижро ишини ривожлантириш жамғармасини ташкил этиш тўғрисида» 2002 йил 17 октябрдаги 358-сон қарори, 1-банд бундан мустасно;

Ўзбекистон Республикаси Вазирлар Маҳкамасининг «Ўзбекистон Республикаси адлия муассасалари ва судларини ривожлантириш жамғармаси тўғрисидаги низомга ўзгартириш ва қўшимчалар киритиш ҳақида» 2003 йил 28 февралдаги 114-сон қарори (Ўзбекистон Республикаси ҚТ, 2003 й., 2-сон, 20-модда) ўз кучини йўқотган деб ҳисоблансин.

10. Ўзбекистон Республикаси Адлия вазирлиги қонун ҳужжатларига мазкур қарордан келиб чиқувчи ўзгартириш ва қўшимчалар тўғрисида Вазирлар Маҳкамасига бир ой муддатда таклифлар киритсин.

11. Мазкур қарорнинг бажарилишини назорат қилиш Ўзбекистон Республикасининг Бош вазири Ў.Т. Султонов ва Ўзбекистон Республикаси Президентининг Давлат маслаҳатчиси А.А. Азизов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2003 йил 18 март,
147-сон

Вазирлар Маҳкамасининг
2003 йил 18 мартдаги 147-сон қарорига
1-ИЛОВА

Судлар ва адлия органларини ривожлантириш жамғармаси тўғрисида НИЗОМ

1. Судлар ва адлия органларини ривожлантириш жамғармаси (кейинги ўринларда Жамғарма деб юритилади) судлар ва адлия органларининг моддий-техника таъминотини яхшилаш, шунингдек улар фаолияти учун зарур шарт-шароитлар яратиш мақсадида ташкил этилган.

2. Жамғарма маблағлари:

умумий юрисдикция судлари томонидан кўриб чиқиладиган ишлар бўйича жарималар ва давлат божлари тўлашдан давлат бюджетига тушаётган суммаларнинг 20 фоизи миқдоридagi ажратмалар;

хўжалик судлари томонидан кўриб чиқиладиган ишлар бўйича давлат божлари ва жарима санкцияларини тўлашдан давлат бюджетига тушаётган суммаларнинг 15 фоизи миқдоридagi ажратмалар;

адлия органлари, шу жумладан ФХДЁ органлари томонидан ундириладиган давлат божи суммаларидан 20 фоиз, давлат нотариуслари томонидан ундириладиган давлат божи суммаларидан эса 15 фоиз миқдоридagi ажратмалар;

адлия органлари томонидан нодавлат нотижорат ташкилотларни, адвокатлик бюроларини, фирмаларни, ҳайъатларни, хусусий нотариал идораларни рўйхатдан ўтказганлик, нотариал ва адвокатлик фаолиятини лицензиялаганлик, юридик кадрларни малака аттестациясидан ўтказганлик учун ундириладиган маблағлар, шунингдек адлия органлари томонидан ўз ваколатлари доирасида ундириладиган жарималар;

ижро иши бўйича бюджетга ундирилган суммадан 30 фоиз миқдоридagi ажратмалар;

ваколатли органлар томонидан олиб қўйилган ва давлат даромадига ўтказилган мол-мулкни сотишдан тушадиган маблағларнинг 10 фоизи;

қонун ҳужжатларида тақиқланмаган бошқа даромадлар ҳисобига шакллантирилади.

3. Умумий юрисдикция судлари биноларини қуриш ва таъмирлаш, уларни зарур анжомлар, компьютерлар ва бошқа замонавий ташкилий-техника воситалари билан таъминлаш Жамғарманинг биринчи навбатдаги вазифаси ҳисобланади.

4. Жамғарма маблағлари:

а) судлар ва адлия органлари бинолари ва хоналарини куриш, таъмирлаш ва жиҳозлашга, уларни зарур анжомлар, компьютерлар ва бошқа замонавий ташкилий-техника воситалари билан таъминлашга;

б) судлар ва адлия органлари техника воситаларига хизмат кўрсатиш ва уларни таъмирлашга;

в) судьяларга (Ўзбекистон Республикаси Олий суди судьяларидан ташқари) малака класслари ҳамда муайян йил ишлаганлиги учун устамалар ва қўшимча ҳақ тўлашга;

г) адлия органлари ходимларига даража класслари ҳамда муайян йил ишлаганлиги учун устамалар ва қўшимча ҳақ тўлашга;

д) судлар ва адлия органлари ходимларини моддий рағбатлантиришга ва ижтимоий муҳофаза қилишга (уй-жой куриш, санатория-курорт ва тиббий хизмат кўрсатиш, маошларга устамалар ва қўшимча ҳақ белгилаш, моддий ёрдам кўрсатиш);

е) кадрлар малакасини оширишга, уларни ўқитишга, тегишли адабиётлар ва матбаа нашрлари билан таъминлашга;

ж) судларнинг (судьялардан ташқари) ва адлия органларининг қўшимча ходимлари таъминотига;

з) судьяларни ва адлия органлари ходимларини формали кийим-бошлар билан таъминлаш харажатларини молиялаштиришга;

и) Жамғарма захирасини яратишга;

к) судлар ва адлия органлари фаолиятини яхшилашга қаратилган бошқа тадбирларга йўналтирилади.

5. Жамғарманинг жорий йилда фойдаланилмаган маблағлари бюджетга олиб қўйилмайди ва улардан кейинги йилда фойдаланилади.

6. Судлар ва адлия органлари ходимларини қўшимча кўпайтириш Ўзбекистон Республикаси Молия вазирлиги билан келишилган ҳолда амалга оширилади.

7. Жамғарма маблағларидан фойдаланиш судларни ва адлия органларини ривожлантириш дастурларини маблағ билан таъминлаш орқали амалга оширилади, ушбу дастурлар ҳар йили маблағлар ва буюртманомалар тушиши прогнози асосида шакллантирилади.

Дастурда судлар ва адлия органлари бинолари ва хоналарини куриш, реконструкция қилиш, таъмирлаш, жиҳозлаш муддатлари ва ҳажмлари; уларни жиҳозлар, транспорт воситалари, компьютерлар ва бошқа замонавий ташкилий-техника воситалари билан таъминлаш, шунингдек судлар ва адлия органларини ривожлантириш бўйича бошқа тадбирлар назарда тутилади.

Судлар ва адлия органларини ривожлантириш дастури, уларни маблағ билан таъминлаш ҳажмлари ҳамда Жамғарманинг захирага қўйиладиган ҳар йилги қисми миқдори Жамғарманинг Кузатувчи кенгаши томонидан тасдиқланади.

8. Жамғарма фаолиятини бошқариш Жамғарманинг Кузатувчи кенгаши томонидан амалга оширилади, унга Ўзбекистон Республикаси Адлия вазири раҳбарлик қилади, у Жамғарма Кузатувчи кенгашининг раиси ҳисобланади. Кузатувчи кенгаш таркибига лавозимига кўра Олий суд ва Олий ҳўжалик суди раислари, Ўзбекистон Республикаси Адлия вазирлиги ҳузуридаги Суд қарорларини ижро этиш, судлар фаолиятини моддий-техника жиҳатидан ва молиявий таъминлаш департаменти директори ҳамда Жамғарманинг ижро этувчи директори киради.

Жамғарманинг Кузатувчи кенгаши ҳар чоракда камида бир марта мажлис ўткази. Зарур ҳолларда Жамғарма Кузатувчи кенгашининг навбатдан ташқари мажлислари чақирилиши мумкин.

Жамғарманинг Кузатувчи кенгаши мажлиси унда Жамғарманинг Кузатувчи кенгаши аъзоларининг камида учдан икки қисми иштирок этган тақдирда ваколатли ҳисобланади.

Жамғарма маблағларидан фойдаланиш бўйича қарор Жамғарманинг Кузатувчи кенгаши аъзоларининг оддий кўпчилик овози билан қабул қилинади ва Жамғарма Кузатувчи кенгаши раиси томонидан имзоланади.

Жамғарма маблағлари тўпланиши ва сарфланишини тезкор бошқариш Жамғарманинг Ижро этувчи дирекцияси томонидан амалга оширилади.

Жамғарманинг Ижро этувчи дирекциясига Ижро этувчи директор раҳбарлик қилади, у Жамғарманинг Кузатувчи кенгаши томонидан лавозимга тайинланади ва лавозимдан озод қилинади.

Жамғарманинг Ижро этувчи директори Жамғарма маблағларидан мақсадли фойдаланилиши учун шахсан жавоб беради.

10. Жамғарманинг Ижро этувчи дирекцияси қуйидагиларга мажбур:

буюртманомаларни йиғиш ва Кузатувчи кенгаш томонидан кўриб чиқиш учун материалларни тайёрлаш;

Кузатувчи кенгаш қарорларини судлар ва адлия органларига етказиш;

Кузатувчи кенгаш қарорларини ўз вақтида ижро этиш;

Жамғарманинг ажратилган маблағларидан фойдаланилишини назорат қилиш ва унинг мониторингини амалга ошириш;

Кузатувчи кенгашга ва Ўзбекистон Республикаси Молия вазирлигига Жамғарма маблағларидан фойдаланилиши бўйича ҳисобот тақдим этиш.

Жамғарманинг ижро этувчи дирекцияси қуйидаги ҳуқуқларга эга:

зарур ҳолларда маблағлар ажратишга тушган буюртманомалар бўйича қўшимча маълумотлар олиш;

ундирилган ва Жамғармага ўтказиладиган пул маблағларининг амалда тушган суммаси бўйича тегишли ташкилотлардан ахборотлар ва статистика маълумотларини сўраб олиш;

Жамғарманинг ажратилган маблағларидан мақсадли фойдаланилишини текшириш;

Маблағлардан белгиланган мақсадда фойдаланилмаган тақдирда молиялаштиришни тўхтатиб туриш, кейинчалик ушбу масалани Кузатувчи кенгашга кўриб чиқиш учун киритиш.

11. Ижро этувчи дирекция ўз Низомига мувофиқ бошқа ҳуқуқ ва мажбуриятларга эга бўлиши мумкин.

Жамғарманинг Ижро этувчи дирекцияси тўғрисидаги низом Жамғарманинг Кузатувчи кенгаши томонидан тасдиқланади.

12. Жамғармадан маблағлар ажратиш юзасидан буюртманомалар Адлия вазирлиги, Олий суд, Олий ҳўжалик суди ҳамда Ўзбекистон Республикаси Адлия вазирлиги ҳузуридаги Суд қарорларини ижро этиш, судлар фаолиятини моддий-техника жиҳатидан ва молиявий таъминлаш департаменти (кейинги ўринларда Департамент деб юритилади) томонидан Жамғарманинг Ижро этувчи дирекциясига тушади.

Жамғарманинг Ижро этувчи дирекцияси тушган буюртманомаларни умумлаштиради ва уларни кўриб чиқиш учун Жамғарманинг Кузатувчи кенгашига киритади.

Ижро этувчи дирекция Жамғарманинг Кузатувчи кенгаши қарорлари бўйича маблағларни юқорида кўрсатиб ўтилган идораларга қабул қилинган қарорга мувофиқ фойдаланиш учун ўтказилади.

Ўзбекистон Республикаси Адлия вазирлиги, Олий суди, Олий ҳўжалик суди

ва Департамент Жамғарманинг Кузатувчи кенгашига Жамғарманинг ажратилган маблағларидан фойдаланилиши тўғрисида белгиланган тартибда ҳисобот тақдим этади.

13. Жамғарма маблағларидан фойдаланиш тўғрисидаги ҳисобот ҳар чоракда Жамғарманинг Кузатувчи кенгаши томонидан кўриб чиқилади ва Ўзбекистон Республикаси Адлия вазири томонидан Ўзбекистон Республикаси Президенти девонига тақдим этилади.

14. Ўзбекистон Республикаси Молия вазирлиги Жамғарма маблағларидан мақсадли фойдаланилишини назорат қилади.

15. Жамғарма маблағларини тўплаш ва улардан фойдаланиш тартиби Жамғарманинг Кузатувчи кенгаши томонидан тасдиқланади.

Вазирлар Маҳкамасининг
2003 йил 18 мартдаги 147-сон қарорига
2-ИЛОВА

Судлар ва адлия органларини ривожлантириш жамғармасини бошқариш ТУЗИЛМАСИ



ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

55 Аҳолини ватанимизда ишлаб чиқарилган ун ва нон маҳсулотлари билан таъминлашни яхшилаш чоратадбирлари тўғрисида

Улгуржи ва чакана савдода сотилаётган ун ва нон маҳсулотларига бўлган истеъмол талабини чуқур ўрганишни ташкил этиш, «Ўздонмаҳсулот» давлат-акциядорлик корпорацияси корхоналари томонидан ишлаб чиқарилаётган маҳсулот асортиментини аҳоли талабига мувофиқ оқилона ўзгартириш мақсадида Вазирлар Маҳкамаси **қарор қилади:**

1. «Ўздонмаҳсулот» давлат-акциядорлик корпорациясининг корпорация ижро этувчи аппарати тузилмасида ходимларнинг штатда белгиланган сони доирасида Маркетинг бошқармасини ташкил этиш тўғрисидаги таклифига розилик берилсин.

Куйидагилар «Ўздонмаҳсулот» давлат-акциядорлик корпорацияси Маркетинг бошқармасининг асосий функциялари этиб белгилансин:

улгуржи ва чакана савдо тизимида уннинг турли навларига ва нон маҳсулотлари турларига бўлган ички истеъмол талабини ўрганиш;

истеъмол талабига мувофиқ ун ва нон маҳсулотлари асортиментини шакллантириш учун ғаллани қайта ишлашни мақбуллаштириш юзасидан таклифлар тайёрлаш;

«Ўздонмаҳсулот» давлат-акциядорлик корпорацияси маҳсулотларига истеъмол талаби прогнозини ишлаб чиқиш ва шу асосда озуқабоп буғдой ва ун ресурсларидан оқилона фойдаланиш юзасидан таклифлар тайёрлаш;

ички ва ташқи бозорларда, биринчи навбатда чегарадош давлатлар бозорларида ғалла, ун ва нон маҳсулотлари бозори конъюнктураси мониторингини ташкил этиш.

2. «Ўздонмаҳсулот» давлат-акциядорлик корпорациясига Ўзбекистон Республикаси Иқтисодиёт вазирлиги ва Молия вазирлиги билан келишган ҳолда аҳоли ва республика истеъмолчиларининг уннинг турли навларига ва нон маҳсулотлари турларига амалда вужудга келаётган истеъмол талабидан келиб чиққан ҳолда озуқабоп буғдойни саноат асосида қайта ишлаш, ун ва тайёр маҳсулот ишлаб чиқаришнинг белгиланган кўрсаткичларига ҳар чоракда тузатишлар киритиш ҳуқуқи берилсин.

3. Ўзбекистон Республикаси Қишлоқ ва сув хўжалиги вазирлиги, «Ўздонмаҳсулот» корпорацияси «Ўзстандарт» агентлиги ва Давлат дон инспекцияси билан биргаликда уннинг турли навларига бўлган истеъмол талабини ҳамда ишлаб чиқарилаётган уннинг нон пишириш хусусиятларини ҳисобга олган ҳолда ҳар йили келгуси қишлоқ хўжалиги йилида буғдойни навлар бўйича жойлаштириш юзасидан белгиланган тартибда таклифлар киритсинлар.

4. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Н.С. Юсупов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2003 йил 25 март,
155-сон

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

56 Ўзбекистон Республикаси Вазирлар Маҳкамасининг «Бозорни истеъмол товарлари билан тўлдиришни рағбатлантириш ҳамда ишлаб чиқарувчилар ва савдо ташкилотларининг ўзаро муносабатларини такомиллаштириш чора-тадбирлари тўғрисида» 2002 йил 13 ноябрдаги 390-сон қарорига ўзгартиришлар киритиш ҳақида

Ўзбекистон Республикаси Вазирлар Маҳкамаси **қарор қилади:**

Ўзбекистон Республикаси Вазирлар Маҳкамасининг «Бозорни истеъмол товарлари билан тўлдиришни рағбатлантириш ҳамда ишлаб чиқарувчилар ва савдо ташкилотларининг ўзаро муносабатларини такомиллаштириш чора-тадбирлари тўғрисида» 2002 йил 13 ноябрдаги 390-сон қарори (Ўзбекистон Республикаси ҚТ, 2002 й., 11-сон, 67-модда) куйидаги мазмундаги 8-банд билан тўлдирилсин:

«8. Мазкур қарорнинг 1 ва 2-бандларида назарда тутилган солиқ имтиёзлари иловага мувофиқ истеъмол товарлари ишлаб чиқарувчи ишлаб чиқариш корхоналарига жорий этилади».

8 ва 9-бандлар тегишли равишда 9 ва 10-бандлар деб ҳисоблансин.

Ўзбекистон Республикасининг Бош вазири Ў. СУЛТОНОВ

Тошкент ш.,
2003 йил 31 март,
164-сон

Вазирлар Маҳкамасининг
2003 йил 31 мартдаги 164-сон қарорига
ИЛОВА

Вазирлар Маҳкамасининг 2002 йил 13 ноябрдаги 390-сон қарорининг 1 ва 2-бандларида назарда тутилган солиқ имтиёзлари жорий этиладиган истеъмол товарлари РЎЙҲАТИ

Т/р	Товарлар гуруҳи	Солиқ имтиёзлари жорий этиладиган товарлар номи
1.	Болаларга мўлжалланган товарлар	Болаларга мўлжалланган товарлар рўйхати Вазирлар Маҳкамасининг 1999 йил 14 июлдаги 327-ф-сон фармойиши билан тасдиқланган.
2.	Маиший кимё ва майда қадоқланган товарлар	Силиқловчи, елимловчи, ювувчи синтетик воситалар, ювувчи синтетик воситалар, ванналар учун кўпикли кир ювиш воситалари, ёғларни кетказувчи ва сувни юшатувчи воситалар, буюмлар ва газламаларни оқартириш, синькалаш ва крахмаллаш воситалари, доғни кетказувчи ва тозаловчи воситалар. Ҳашаротлар, кемирувчиларга қарши кураш учун товарлар ҳамда дезинфекциялаш воситалари, пластилин, аэрозол идишдаги соч учун лок.

Т/р	Товарлар гуруҳи	Солиқ имтиёзлари жорий этиладиган товарлар номи
3.	Маданий-маиший ва хўжалик мақсадидаги товарлар	<p>Маиший электр машиналари ва приборлар, шу жумладан гўшт майдалагичлар ва электр гўшт майдалагичлар, шарбат сиққичлар, ошхона комбайнлари, электр миксерлар, сочни куритиш учун фен, кофе янчгичлар, электр дреллар, тостерлар, иситувчи колориферлар, микротўлқинли печлар, электр дазмоллар, идиш-товоқ ва ошхона приборлари, шу жумладан турмушда фойдаланиладиган ҳар хил ошхона анжомлари, қошиқлар, пичоқлар, вилкалар, металлнинг барча турларидан ясалган ликопчалар, ҳар хил куракчалар (балиқ, блин, ёғ учун куракчалар ва бошқалар), металл ва қотишмаларнинг ҳар хил турларидан ясалган рўзгорда ишлатиладиган металл идишлар, мусиқа асбоблари, барча турдаги болалар ўйинчоқлари, шу жумладан юмшоқ ўйинчоқлар, грампластинкалар, компакт ва лазер дисклари, аудио- ва видео кассеталар, соқол олиш приборлари, тиш чўткалари, кўзойнақлар учун ғилофлар, тугмалар (пластмасса, металл, ёғоч тугмалар ва бошқалар), болалар ванначалари, сув ва ахлат учун челақ.</p> <p>Якка тартибда фойдаланиладиган антенна комплекслари, маиший соатлар, гальваник элементлар ва батареялар, қулфлайдиган ва майда-чуйда металл буюмлар, кранлар ва силжитгичлар.</p> <p>Газ билан ишлайдиган автоматик маиший сув иситгичлар, маиший насослар, газ ва электр плиталари, плафонлар ва рўзгорда ишлатиладиган сочувчилар, термослар, нормал ёритадиган электр чироқлар.</p>
4.	Мураккаб маиший техника ва радиоэлектрон аппаратлар	<p>Барча турдаги маиший кир ювиш машиналари (кир қўлда сиқиладиган, ярим автоматик, автоматик). Барча турдаги маиший совутгичлар ва музлатгичлар.</p> <p>Оқ-қора ва рангли тасвирли телевизорлар, радио тўлқини қабул қилиш қурилмалари: радиоприёмниклар, радиолалар, магнито радиолалар, магнитоалар, радиокомплекслар ва мусикали марказлар, магнитофонлар, барча турдаги қўшимча магнитофонлар, кўзи ожиз ногиронлар учун овоз чиқарадиган китобларни эшиттириш магнитофон қурилмалари, диктофонлар, оқ-қора ва рангли тасвирли видеомагнитофонлар ва қўшимча видеомагнитофонлар, видеопроекторлар, овоз чиқариш колонкалари, электрон эшитиш аппаратлари, маиший видеомагнитофонлар учун видео-телекамералар.</p>
5.	Кир совун ва атир совун, кир ювиш порошоги	Ювиш учун ва рўзгорда ишлатиладиган, таркибида ёғ бўлган кир ювиш воситалари (атир совун ва кир совун, кир ювиш порошоги, кир ювишда ишлатиладиган параха).
6.	Пардоз-андоз буюмлари, тиш пастаси	Одеколонлар, атирлар, кремлар, соч, тери, тишни парвариш қилиш воситалари, упа, зийнат бахш этадиган пардоз-андоз буюмлари, лосьонлар, тана учун бадбўй ҳидни йўқотувчи воситалар, офтобда қорайиш воситалари, чивинга қарши воситалар.
7.	Аёллар гигиенаси буюмлари	Аёллар гигиенаси буюмлари рўйхати Вазирлар Маҳкамасининг 1999 йил 14 июлдаги 327-ф-сон фармойиши билан тасдиқланган.
8.	Тикув, трикотаж, пайпоқ буюмлар, тўқимачилик атторлиги	<p>Устки кийим: аёллар, эркаклар, ўсмирлар ва болалар пальтолари, куртчалари, костюмлари; аёллар кўйлаги, қиз болалар кўйлаги ва ясида кийиладиган кўйлақлар; эркаклар ва болалар кўйлақлари.</p> <p>Чойшаб буюмлари: кўрпа-тўшак жилдлари, чойшаб, ёстиқ жилдлари, кўрпа жилдлари, пастга солинадиган чойшаб, аёллар ва болаларнинг тунги кўйлақлари, эркаклар ва болалар пижамалари;</p> <p>жун, ярим жун, ип газлама ва момиқ адёллар, шу жумладан қалин жун рўмол;</p> <p>ички ва устки трикотаж кийимлар, пайпоқлар, қўлқоплар, бошмалдоқ қўлқоп, бош кийимлари.</p> <p>Ип газламадан тайёрланган синтетик, ярим жунли ва калаванинг бошқа турларидан тайёрланган тиббиёт буюмлари (бинтлар, чўлтоқлар учун ғилоф, тиззобанд, тирсакбанд, болдирбанд, богич ва бошқалар).</p> <p>Пардабоп тўрлар, тўр (кружева), шарфлар, дастрўмоллар ва рўмоллар, рўмолчалар, галстуклар, манжетлар, энсиз ёқа, поёндозлар, салфеткалар, дастурхонлар, ёпқичлар (накидки), ўрин ёпинчиғи, дарпардалар, гиламчалар, соябонлар ва соябонлар учун ғилофлар, газламадан ясалган абажурлар, тўқилган хўжалик сумкалари, болалар сумкалари, тўр беланчаклар ва тўр халталар, ленталар, уқа (жияк), богичлар, резинали богичлар, шокилал буюмлар ва тўқимачилик атторлигининг бошқа буюмлари.</p>

Т/р	Товарлар гуруҳи	Солиқ имтиёзлари жорий этиладиган товарлар номи
9.	Чарм, чарм-атторлик ва мўйна буюмлар	<p>Портфеллар, папкалар, сафар халталар, кармонлар, сумкалар, портмоне, ҳамёнлар, муқовалар, ғилофлар, несессерлар, портсигарлар, қўлқоплар, иш қўлқоплари, камарлар, чемоданлар, саквояжлар, қоплар, ғилофлар, спорт-ов буюмлари, тўплар.</p> <p>Мўйнали ва қўй терисидан ясалган пўстин, мўйнали бош кийимлари, ёқа, мўйна, ёпқичлар (пластина), скрои, аёлларнинг мўйнали бош кийимлари, иш қўлқоплари ва мўйнали қўлқоплар ва қўй терисидан ясалган пўстин, мўйнали ва қўй терисидан ясалган бошқа буюмлар — пайпоқлар, ғиламлар, эсдалик совғалар, безаклар, шиппақлар.</p>
10.	Бош кийимлари	Барча турдаги бош кийимлари, шу жумладан фетр бош кийимлар (шляпалар, беретлар, қалпоқлар), тикилган ва мўйнали, пат ва тивитдан ясалган тикилган ва мўйнали бош кийимлар.
11.	Пойабзал (шу жумладан резина пойабзал)	Кундалик, модели, спорт, уйда кийиладиган, ортопедик, енгил, миллий, шу жумладан юқори қисми табиий, сунъий ва синтетик теридан, газлама ва нотўқима материаллар ва трикотаж полотнодан қилинган, шунингдек юқори қисми ҳар хил нарсалардан қилинган, тагчарми чармдан ва терининг ўрнини босувчи материаллардан, полимер материаллардан ясалган пойабзал.
12.	Чинни, фаянс ва керамика буюмлари, қолипланган алюминий идишлар, шиша идишлар	<p>Турмушда ишлатиладиган сортли идишлар (шиша ва биллур идишлар).</p> <p>Турмушда ишлатиладиган чинни-фаянс идишлар (шу жумладан ярим чинни ва сирланган сопол идишлар).</p> <p>Керосин шиша лампа, лампа шиша, сопол идиш.</p> <p>Қолипланган алюминий идишлар, шу жумладан қошиқлар, вилкалар, ликопчалар ва бошқалар.</p> <p>Иссиққа чидамли шишадан ясалган ошхона идишлари.</p> <p>Шиша буюмлар ва мебель саноати учун ойна, шиша идишлар, шу жумладан мураббо ва тузланган нарсалар учун бутилка, банка, бочкачалар.</p>
13.	Оқ қоғоз, қоғоздан ясалган буюмлар, босма маҳсулотлар ва идора ашёлари ҳамда мактаб анжомлари	Блок-дафтарлар, чизмачилик ва расм солиш учун блоклар ва альбомлар, қайд этиш, эскизлар, ноталар, чизмачилик ва расм солиш учун қоғозлар (шу жумладан кўзи ожизлар учун), ёзув қоғози, ёзув машинкаси учун мўлжалланган қоғоз, мактаб кундалик дафтарлари, мактаб дафтарлари, ҳарfli ва предметли алифбо, ҳарfliлар, бўғинлар, рақамлар кассаси, чизгичлар (шу жумладан логарифмик чизгичлар), савод китоблари, ҳар хил плёнкалардан ясалган қоғозлар учун папка, чизмачилик ва расм солиш учун қоғоз ва картондан ясалган папкалар, қаламдонлар, барча турдаги ручкалар, фломастерлар, идора қоғоз қисқичлари, транспортирлар, ҳарfli ва рақамли трафаретлар, учбурчак чизгичлар, снѐхдонлар, готовальни, барча турдаги қаламлар (шу жумладан механик қаламлар), перолар, ўчиргичлар, қоғоздан ясалган санитария-гигиена буюмлари, қайдлар учун кундалик дафтарлар, расм солиш, ноталар, сўзларни ёзиш, эскизлар учун дафтарлар, умумий ва техник дафтарлар, шахмат тахталари (қоғоздан ва картондан ясалган), қоғознинг техник сортлари — жило берилган, нуқрадек оппоқ қоғоз, расм солиш учун қоғоз (рулонларда), ёзув машинкалари учун миллиметрли, нусха кўпайтирувчи қоғоз, чизмачиликда ишлатиладиган қоғоз.
14.	Мебель, мебель аксессуарлари	<p>Турмушда фойдаланиладиган мебель:</p> <p>ошхона мебели: иш жавон-столлари, осма жавонлар, ошхона столлари, курсилар, буфет, юмшоқ ва қаттиқ ошхона учбурчак мебели, стуллар;</p> <p>ѐтоқхона мебели: кийим учун жавон, ички кийимлар учун жавон, каравотлар, икки томонлама юмшоқ матраслар, каравот ѐнида турадиган такурси, кийим-кечак турадиган яшикли жавон, уч табақали тошойна, тик тошойна, зифат жавони;</p> <p>корпусли мебель: кўп вазифали жавонлар, китоб жавонлари, идиш жавонлари, сервантлар, ёзув столи, бари бор жавонлар, китоб тоқчалари, телевизор остига қўйиладиган таглик, радио аппаратлар остига қўйиладиган таглик, сандиқлар;</p> <p>юмшоқ мебель: диванлар, креслолар, йиғма диванлар, тебранма кресло, кресло-каравотлар;</p> <p>болалар мебели: каравотлар, ўйинчоқлар учун жавон, кийим-кечак учун жавон, ички кийимлар учун жавон, ёзув столлари, компьютер учун столлар, болаларга мўлжалланган юмшоқ мебель (кресло, диван);</p> <p>турмушда ишлатиладиган бошқа мебель: шу жумладан гигиеник қопламали, металл каркасли мебель.</p> <p>Брезент қопланган, дала ҳовлида ишлатиладиган йиғма мебель (столлар, стуллар, креслолар, каравотлар ва ҳоказолар).</p> <p>Мебель аксессуарлари: ѐғоч тутқичлар, пластмасса тутқичлар, тўртта шарнирли ошиқ-мошиқлар, экцентрик тортичлар, тоқча тутқичлар, шиша тутқичлар, ойна тутқичлар, пойнак, бурчакли тортичлар, учбурчаклар, штанга тутқичлар, винтлар, гайкалар, илгақлар, қоғозқисқичлар, шайбалар, шкантлар, ѐғоч йиғма каравотлар, ѐғоч штангалар, ѐғоч силлиқлагичлар.</p>

Т/р	Товарлар гуруҳи	Солиқ имтиёзлари жорий этиладиган товарлар номи
15.	Гилям ва гиламбоп буюмлар	Гилям ва гиламбоп буюмлар (шу жумладан поёндозлар, ўлчамли парча гилам).
16	Ип газлама, ипак, жун, синтетик ва кимёвий толалардан тайёрланган тайёр газламалар	Ип газлама, шу жумладан табиий, синтетик, кимёвий толалардан ва кимёвий (штапель) толалардан тайёрланган момиқ, жун, ипак газламалар.
17.	Қурилиш материаллари	Ванналар, раковина (чаноқ)лар, унитазлар, гулқоғозлар.

